

ASO LUA, 28 IUNI 2022

Na nofoia e le Fofoga Fetalai le Nofoa i le itula e 9:28 i le taeao.

Tatalo.

FOFOGA FETALAI: Ou te faasilasila atu ua amatalia nei Tualumaga a le Fono Aoaofa Fofoga.

E le toe tau lolouina faa-laau tapue mamalu o lena taeao, ae ou te faatalofa ma faafeiloai atu i le tulaga aloaia o le Palemene ma le tatou Maota nei i le afioga o le Afioga i le Sui Palemia, faapea foi le paia o le Kapeneta faapea foi Minisita Lagolago. Afio le Sui Taitai o le Itu Agai ma sui usufono mamalu uma o le Palemene, malo le soifua manuia ma le lagi e mama i lena taeao fou.

E faatalofa atu foi i Ofisa Sili o Pulega o Matagaluga ma Faalapotopotoga Tumaoti a le tatou Malo, malo le usu. Samoa ma lau faafofoga tapuai mai, matou faatalofa atu i lena taeao fou.

Mo le faaauauina o le tatou galuga i lena aso, ia sagai ae ai o le tai, faamanuia le Alii i le usugafono a le tatou Maota ma le tapuai mai foi a si o tatou atunuu.

TULAFONO TAU FAAOFI O LE FAATATAUINA O TUPE FAAOPOPO (NU.2) 2021/2022 & TULAFONO TAU FAAOFI O LE FAATATAUINA O TUPE 2022/2023 – felafolafoaiga faaauau i luga o le faitauga faalua – Aso Fono lona 6

FOFOGA FETALAI: E tolopo Galuga a le Fono Aoaofa Fofoga i le po anapo o lo o saunoa talifuaitau le Afioga i le Minisita o Tupe i mataupu sa laga i saunoaga faalauaitale a sui usufono o le Palemene. O le mea lea ou te tapa ma le agaga faaloalo lau Afioga i le Minisita o Tupe e te tulai mai e faaauau lau saunoaga.

Afioga Hon MULIPOLA ANAROSA ALE MOLIOO (Minisita o Tupe): Faafetai i lau Afioga i le Fofoga Fetalai o le Maota. E talitonu foi ua maea ona e siitia le tatou taulaga molia i luma o le Atua, tatou te faanonomanu ai i le Agaga Paia o le Atua e taitoalua ma le tatou Palemene aua lava o tatou tiute ma faiva faa-Taitai o le tatou atunuu. I le

suafa manumalo o le Atua ou te faatalofa atu ai i lau Afioga i le Fofoga Fetalai o le Maota. Ou te talitonu foi e le o mafai ona paau mai le tatou Taitai po o le Afioga i le Tamaitai Palemia, ae o lo o manatua pea i a tatou talosaga ina ia folau pea i manu ma tatou feiloai i se taimi o lata mai.

E faatalofa atu i lau Afioga i le Sui Palemia ma le mamalu o Minisita o le Kapeneta faapea Minisita Lagolago. E faatalofa atu i le Susuga i le Sui Taitai o le Vaega Faaupufai, faapea sui usufono mamalu uma o lenei Palemene.

O se laolao foi ou te faatalofa atu ai foi i lau Afioga i Le Ao Mamalu o le Malo ma lau Masiofo, le Sui o le Fono a Sui Tofia, o le paia lava lea aua Tama ma Aiga, Tumua ma Pule, Aiga i le Tai ma le Vaa o Fonoti.

E faafeiloai atu foi i le tapuaiga a le Afioga i le Faamasino Sili ma le mamalu o Alii ma Tamaitai Faamasino.

Le tapuaiga mamao mai a so o se tama fanau a Samoa i so o se atunuu, ae tainane le paia o le Aiga Sa Levi, le paia o le aufaigaluega a le Atua o lo o nonomanu aua se manuia mo Samoa.

Ae le faagaloina le tapuaiga a Tutuila ma Manua, le paia lava lea aua Sua ma le Vaifanua, Fofu ma Aitulagi, Saole ma le Launiu na Saelua, Tama a le Manua ma le Tootoo o le Faleula.

E le faagaloina le tapuaiga a si ou itumalo o Palauli Sisifo po o Palauli 1. Le afio o Letelemana ma Leaupepe, afio le Alo o Lilomaiava, le mamalu ia te oe le falelua. Afio le Matua le Tauavamea, afifio le uso o Leilua ma Faliuga, Leitualamavae ma le Tama a le Fale, faapea le nofo a ituaiga i le Ailaoa. Afio lau Afioga i le Sao Faatupuinati, afio lau Afioga Tuuauato ma le Falesefulu o Pesefeamanaia. Afio Alo o Lilomaiava ma le nofo a usoalii, alaalatai e na tai i upu ia Gagaemalae. Afifio Aiga, alaalatai le Matua ia Tuato ma Tuitolovaa ma le mamalu o le faleupolu o Tofiga a Salemuliaga. Afifio Suafa ma Sa Laulu, alaalatai Faatoafe ma le nuu e faigata. Afifio le Aiga Paia, le Aiga Salevalasi, alaalatai le tautalaga ia Faiumu, faapea le falefa ma le faigata.

Ou te faatalofa atu foi ma ofo alofa atu i le paia i le aufaigaluega tofofi a le Atua i totonu o lou itumalo, e amata mai i Fuailalo seia paia Taga. E le galo la outou tapuaiga ma tatalo, o lea ua manuia ai faiva o la outou auauna faatauva.

Ou te faapai atu foi i le faafofoga tapuai mai a si o tatou atunuu Samoa aoao i ou mamalu faale-talalelei, mamalu faale-atunuu ma ou mamalu faale-Malo. Tatou patipatia pea le agalelei mai pea o le tatou Matai Sili ona o Lana faasoa mai i le ola ma le malosi, aemaise le taitai mai o lo outou soifua ma so matou ola i lenei aso, faamalo le fai o le faiva ma le lavapapale.

E maea le tatou feiloaiga anapo o le po foi ua sola, ua oo mai lau tautalaga i nisi foi o fesili a le tatou Palemene, sa fesiligia ai e le Sui Tamaitai mai Alataua Sisifo le leai o se sootaga o le fiscal strategy ma sustainable development goals. Lau Afioga i le Fofoga Fetalai, e fia faamanino foi le fesootaiga o le faamatalaga o fuafuaga ma tupe a le Malo 2022/2023, fiscal

strategy statement 2022/2023 ma le SDG po o le manulauti mo atinae mausali a le lalolagi, e pei ona laga e le sui usufono mamalu mai Alataua Sisifo. O le tali atu i le faafesili e faapea, e sao lau Afioga, e leai se sootaga o documents nei e lua, o le fiscal strategy statement ma le sustainable development goals. E eseese mamao documents ia e lua ma lo laua faaogaina.

O le fiscal strategy, o le taiala lea e patino lava i le mataituina o tulaga tau tupe a le Malo, faatasi ai ma fuafuaga mamao tau le tamaoiga. Atonu o le document e tele le sootaga ma le sustainable development goals o lo o promote mai e le tatou Malo Aufaatasi, o le tatou PDS po o le pathway, ona o le taiala lea o lo o ave i ai le faamuamua a le Malo i le taimi lenei ma e i ai le taimi e tatau ai ona tuufaataasi mai e Matagaluega, pe faapefea ona integrate mai le SDG i le PDS ina ia mafai ona gafatia le faatupeina e le Malo o fuafuaga uma nei, aua e aoga uma lava nei taiala i le fuafuaga a le Malo o lo o i ai nei, ma ia faaogatonu ai le tagata soifua i le atinae o le atunuu. Aua o le lelei o tatou tagata i le ola aoaoina aemaise le soifua maloloina, o faailoga vaaia lena o se atunuu manuia.

O nisi o fesili sa tuuina mai, tau o le suauu. O lava tane suauu o lo o i ai nei. Ua tai maea le konekarate o supply aloaia ai nei ae toe faasalalau ia mafai ona aumai se isi kamupani e mafai ona fesoasoani mai i le mauuluga o le tau o le suauu. Lau Afioga i le Fofoga Fetalai po o le Fofoga o le Fono ma le mamalu o le Palemene, e tusa ma le 10.8 miliona lita pe 9,047 mita tone le aofaiga o le tiso e mafai ona teuina i a tatou tane ma tiso lava ia. Ma e gafatia ai ona tali atu i manaoga masani o le atunuu mo aso e tusa ma le 82 aso, po o le sili atu ma le 2 masina. E tusa lea ma le 132 mita tone i le aso. E talatutusa foi ma le tulaga i tane o lo o teu ai le penisini, pe a ma le 7.9 miliona lita i lona aofaiga pe 5,795 mita tone, ma e gafatia ai le 70 aso po o le sili atu foi ma le 2 masina.

Lau Afioga i le Fofoga Fetalai, o le tulaga o le konekarate o le supplier o le suauu mo si o tatou atunuu, o le taimi nei, o lo o faafoeina lenei tulaga e le kamupani a le Exxon Mobil ina ua faamanuiaina ma tauofoga sa faatino mo le 5 tausaga e amata mai i le 2018 seia oo atu i le 2023. O lea la ua amata foi galuega a le tatou Matagaluega o Tupe, ina ia iloilo uma tulaga tau i le faafoeina o le toe faasalalauina o lenei konekarate pe a maea le konekarate o lo o i ai nei i le aso 31 o Iulai 2023. O le fuafuaga o le a faasalalau lenei galuega e pei ona masani ai i le faaiuga o lenei tausaga 2022 ma faatino uma ai tulaga tau iloiloga o tauofoga i le amataga o le 2023 ina ia faapea ona maua se kamupani e faaauauina lenei galuega taua mo Samoa ae le i maea le konekarate o lo o i ai nei ia Iulai 2023.

Lau Afioga i le Fofoga Fetalai, o le a faapea foi ona faatino le iloiloga ma le faafoeina o tauofoga mo le konekarate mo se kamupani e tufatufaina, distributor, le suauu i totonu o Samoa pe a maea le konekarate o lo o i ai nei ma le kamupani o le Petroleum Products Supplies Limited po o le PPS pe a

maea foi le latou konekarate o lo o i ai nei mo le lima tausaga 2019-2024, e oo atu i le tausaga 2024.

O nisi o fesili sa tuuina mai, tupe maua ua le mafai ona aoina i le tausaga lenei ma le \$89 miliona o tupe pau fuafuaina mo le tausaga 2022/2023. E faapefea pe o fea foi o lo o faamoemoe le Malo e faatupe mai ai lenei eseese? aua o tupe ua faaaga mo galuega, a le mafai la ona maua, o fea o le a faatupe mai ai galuega?

Lau Afioga i le Fofoga Fetalai, e pei ona silafia o le Tala o le Tupe o lo o fua i luga o tinoitupe a le Malo o lo o maua ma faasoia i tausaga taitasi, ae le o aafia ai faaputugatupe a le Malo lea o lo o aofia i faamatalaga o tupe a le Malo po o public accounts lea o lo o auina mai i tausaga taitasi mo le lauliliuina e le Palemene.

O nei faaputugatupe, e aofia ai sinking funds a le Malo po o faaputugatupe faaaga mo le togiina o aitalafu a le Malo. O lo o tele foi le avanoa e mafai ona faatalanoa ai a tatou paaga mo atinae o lo o auala mai ai tatou budget supports mo nisi vaegatupe faameaalofa e fua lea i le faatinoina ma le manuia o a tatou atinae e aofia ai ma polokalame mo itumalo.

Lau Afioga i le Fofoga Fetalai, afai lava e oo atu i se tulaga matuai pagatia lava, o lo o i ai le avanoa tatou te saili ai ni nonogatupe e maualalo pe itiiti tului, ae pei ona tuuina atu i se faamatalaga i le taimi ua sola, o le a galulue pea le Matagaluega o Tupe e mataitu ma fetuutuunai vaegatupe ina ia aua ne i oo i lea tulaga.

Tulaga o lo o i ai nei le foreign reserve ma faiga faavae e vaavaai ai ona o aafiaga o le siitia o le tau o oloa mai fafo, aemaise le tau o le suauu. Lau Afioga i le Fofoga Fetalai, na afea foi i le saunoaga a le sui usufono mai Vaimauga le tulaga i a tatou foreign reserves. O le aofai o tupe faaleoleo faaaga i le faaiuga o Aperila 2022, sa tulai mai i le \$760 miliona. O lo o mafai ona faatauina mai ai oloa faaulufaleina mai fafo po o imports mo se vaitaimi e tusa ma le 10 masina. O se tulaga maualuga lea o lo o i ai tatou tupe faaleoleo pe a faatusatusa atu i le alafua faatatau manaomia e tataua ona mataituina, o le 4 masina. Ua mautu faiga faavae eseese a le Faletupe Tutotonu, aua le mataituina o tupe faaleoleo ina ia gafataulimaina le togiina o oloa faatauina mai fafo, ma ia gafatia le faasoia i taimi o faalavelave tutupu faafuasei.

Aisea ua faasee ese ai le Tala o le Tupe, le tutoatasi mai le Matagaluega o Tupe pei ona saunoa ai foi ma fesiligia ai e le sui usufono mo Anoamaa 2. Lau Afioga i le Fofoga Fetalai, atonu o le fesili lea sa tuuina mai, mo le silafia e le tatou Palemene, o le Afioga i le Tamaitai Palemia, o le Taitaifono lea o le tatou Tutoatasi. E pei lava ona silafia o le tatou Tutoatasi na amata tatala mai ma faailogaina i le aso 1 o Iuni 2022, o lo o faagasolo i le tausaga atoa ma faataatia foi le latou polokalame e pei ona talanoaina ai le Komiti.

Sa fesiligia foi le TVET scholarship, atonu ua maea foi ona saunoa i ai le Afioga i le Minisita o Aoga. Ou te fia avea foi lenei avanoa e faailoa atu ai

le faamoemoe mo le siitia o le sikolasipi tau TVET i lalo o fesoasoani tuusao, budget support, o lo o faatupeina lea e le Malo o Niu Sila ma Ausetalia, aua aoaoga tau TVET i le Iunivesite Aoao o Samoa. O nei sikolasipi, o le a siitia mai le \$700,000 i le \$1.4 miliona.

E i ai le fesili na fesiligia anapo, pe i ai se fesootaiga o le GDP ma le poverty. Lau Afioga i le Fofoga Fetalai, lea sa fesiligia e le sui usufono mamalu mai Sagaga 2 le fesootaiga o ia vaega e lua. O le taofi o le tele o tagata i le lalolagi o lo o i ai le tomai mo le vaavaaia o tulaga tau tamaoaiga po o economist, o le siitia o le tamaoaiga, e siitia ai ma tupe maua a tagatanuu uma o se atunuu, aua o lo o faatupulaia atinae ma alatupe. O le luitau o lo o tulai mai, e le o mafai ona tuutiitia le faatupulaia o le tamaoaiga i le eseesea o lo o i ai tupe maua a e mauoa ma e matitiva. O lenei tulaga, e taua o le economic inequality. Lau Afioga i le Fofoga Fetalai, o le economic inequality lea, e faamoemoe e amata fofo i le polokalame o le \$1 miliona i le itumalo, ina ia mautinoa o le faatupulaia o le tamaoaiga, o le a faatupulaia ai foi ma alagatupe mo aiga i totonu o nuu ma alaalfaga.

Susuga Maulolo Tavita Aмоса (Sagaga 2): Lau Afioga i le Taitaifono...

FOFOGA FETALAI: Malie lau Afioga i le Tamaitai Minisita se i tuu atu le avanoa i le tootoo mai Sagaga 2. Ia saunoa lau Afioga i le sui usufono mamalu.

Susuga Maulolo Tavita Aмоса: O le a ou le toe asa tulaga o sa ma faiga o Samoa, ua maea ona to so latou matupalapala e ala i le faatulima a lau Afioga i le Fofoga Fetalai. Ae ua fia tuliloaina le mataupu lea ona o lea sa ou talanoa i ai. A faapea o le finagalo lea o le a fofo le economic inequality lea i le \$1 miliona, e tumau lava lau fesili. E faapefea ona tupu le mea na saunoa i ai le Minisita anapo lea e vaai le vaega o Fuainumera Faamaumauina? O le alu i luga o le tatou graph o le GDP ae toe alu atu ai foi i luga ma le poverty line? Aua i lou lava malamalamaga faa-numera, afai ua alu i luga le GDP, alu i lalo le poverty line. Peitai, o lea e taufetuli faatasi mea ia. Ia o lea la ua maua atu le inequality lea ua saunoa i ai. Pau lava lea o se fautuaga, aua o le taua ia, ua ou le faalavelave anapo i le mea lea na aumai e le Minisita o Faatoaga, le tulaga o le ese o le matau i le tulaga o i ai le maualuga o le tatou GDP, ese le reality lea e i ai aiga i Samoa. O le taua ia o le point lea. Ioe. O lona uiga, ua i ai se tulaga e ono fesiligia ai fuainumera.

Ae silasila foi le mamalu o lenei Maota lau Afioga i le Fofoga Fetalai, o a tatou forecast, o a tatou mea uma lava e fai i tupe faatatau ma nei mea uma, e fuafua i le analysis o fuainumera. O i ina e tau mai ai e fuainumera, po o se tonu lelei o le a fai pe leai. Ae a oo mai loa la se tulaga ua fesiligia ma felautoai tulaga o fuainumera faamaumauina, ona i ai lea o se fesili tele lava

na oo mai ia te au anapo, o fea la e maua ai le toafimalie? Ina ia tatou maua se forecast manaia mo le agai i luma.

Ia, e le o se faitioga, a o se tuualalo ma tuutuu atu lava se tauau e silasila totoa ane i tulaga ia, leaga e ogaoga lava le faamaite lea o le a fai. Ma e avatu lava lau faamalo toatasi, ae taua la le tidy up uma o nai mea ia e tau loose mai, ona tatou taunuu lea i le manuia. Faafetai lava.

FOFOGA FETALAI: Malo faafetai. Se i tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi (Minisita o Faatoaga ma Faiga Faiva): Faafetai i lau Afioga i le Fofoga Fetalai ua alafai foi i le taeao manuia lenei taeao fou i le alofa ma le agalelei o le Atua. Na o sina faamalamalama laitiiti lava i le mea lea ua oo i ai le saunoaga a le Afioga i le Tamaitai Minisita. Ioe, e pei lava ona faamalulu atu foi anapo ne i te i ua mau eseese faapea ua fai se tala e uiga i tatou fuainumera. O le agaga moni lava lena lau Afioga i le Tamaitai Minisita, leaga o lea sa sau o tatou fuainumera e le faia e tatou faapea e calculate mai fafo. I lau la matau, e ese lava le calculation mai fafo ese le mea lea e tupu i le atunuu. O i ina lea sa momoli atu ai le feau i lena Itu o le Maota. E pei ona ou fai atu, o le 2014 i le 2015 ua aveese Samoa from Least Development Nations. Ua mafai ona tu Samoa i ona vae e atinae e ia ia. A o le a le mea lea e tupu? O lea lava tatou te ola faalagolago i atunuu mamao, lea e aumai ai fesoasoani e fai ai le tatou paketi. O le tatou paketi, o lea lava e deficit. A na leai remittance, e le mafai ona tatou soifua ma oka oloa.

O le tulaga i le manuia lautele ma le lumanai o tagata uma i nuu ma afioaga i tua, o lena tou te silafia le mea lea tatou te i ai, i le le feauauai la o tulaga o faamaumauga o lo o i ai tatou forecast. Forecast is only forecast, a o le reality o le mea lea e tupu, ia lena tou te silafia, e le o gafataulimaina e le atunuu le soifuaga e tatau ona tatou ola ai. E pei o le ala lena o le avatu o le faamamafa i le Afioga i le Minisita o Faamaumauga ma le Minisita o Tupe, toe fetuunai a tatou faamaumauga i le mea lea tatou te ola ma o tatou soifua ai. Aua e ese lava le nofonofo o le UN i o ma calculate mai ana figures, ese le calculate ina e le pule mamalu a alii ma faipule ma le tatou Malo.

Ia o si au toe fesoasoani atu lea lau Afioga i le Minisita o Tupe.

FOFOGA FETALAI: Malo. Ia, o fautuaga lava mo le agai i luma ma poupou ai foi le lumanai o le atunuu. Ia, lau Afioga i le Minisita o Tupe. Mo le faasaoina o lou taimi, se i tulai mai le sui usufono mo Vaimauga 3.

Afioga Hon Tapunuu Niko Lee Hang (Vaimauga 3): Faafetai mo le avanoa. E leai na ona toe faamanatu atu i lau Afioga i le Minisita o Faatoaga, o mea ia e fua mai i le UN o lo o fua ai foi le tamaoiga i le tulaga faa-

international. Ae pei ona ou taua anapo, e le faia e tatou calculations ia pei o lena foi e te saunoa mai ai. A o tulaga ia o le faamasinoina o tatou i le tulaga lea o atunuu e vaivai le tamaoaiga, ia o lena ua ia latou le tomai lea tatou te faamoemoe ai foi i isi mea. Ae faafetai o lea ua manino mai lau faamatalaga, ia e pei o le faamasino lava lena a tatou ia i le tulaga lea e i ai le tatou atunuu i le taimi lenei i le mea o le mativa. Ae pei foi ona ou faamanatu atu i lau Afioga, o le tulaga foi lea ua aveese ai tatou mai atunuu e vaivai le tamaoaiga, o le tulaga lelei. Aua leaga sa saunoa foi le Sui Taitai o le matou Vaega anapo, e le i taitai faatusaina le mativa lea a tatou ma le mativa lea e i atunuu la i fafo. O le alafua foi la lena o lea e aumai e le UN ona o le reality lea foi e talanoa mai ai latou ma upgrade ai le tatou tulaga i le mea lea o atunuu e vaivai tamaoaiga.

Ia, na ona ou faapena atu, ae o lena ua fai la outou galuega. Ae ia manuia outou faiva. Ma le faaaloalo lava.

FOFOGA FETALAI: Faafetai o lea ua manino le saunoaga a le sui usufono mamalu. Saunoa mai lau Afioga i le Minisita.

Susuga Hon Laauli Leuatea Polataivao Fosi: Lau Afioga, e leai se agaga e faataumatatao i le saunoaga a le sui usufono mamalu, o se tasi foi o fetu pupula o mea tau tupe a le tatou atunuu, ua leva ona alaala ma tautua i le Matagaluega o Tupe. Ae pei ona ou fai atu, o calculation la e fai mai o i le UN, e fua i a tatou mea o lea e avatu, fua i tatou faamaumauga ia e avatu e le tatou Malo ona calculate mai lea e o le mea lea e i ai tatou. A o le tulaga lea ua tatou i ai, ua tatou i ai i le global affection lea ua tatou i ai i le taimi lenei. E tatou te le faalagolago la e fai mai e o tonu o tatou, e fai e tatou le mea e fetau mo le atunuu. O le ala lena lau afioga i le sui usufono mamalu, ou te le faataumatatao, e sao oe. Ae a oo loa i le tulaga lautele ua tupu le faaletonu, ua aafia le lalolagi atoa, ia ona tapasa loa lea o le tatou vaa i le mea e fetau ma tatou.

O lea e taumafai atu nei, a lea e saunoa atu nei le Tamaitai Minisita o Tupe, o le a le tatou fua e tapue ai ma faapaleni ai le tamaoaiga o le atunuu? Ia tutusa le tagata mauoa lea e i le taulaga ma le faifaatoaga lea e i tua i Aleipata po o Falealupo? O lea ua avatu le matafaioi lea. Ua avatu le uluai fesoasoani mo le uluai taimi, se i tau aumai i luga le pasene lea o le lima vaivaima ma le le tagolima, ina ia faalagatasia. Ae ou te le tetee i le tulaga lea, ae pei ona ou tulai e faamalamalama, o faamaumauga uma ia e aumai e le UN, e fua i mea ia tatou te lau atua. O nisi la o taimi, e ese mea e lau mai i le Maota, ese mea e lau i fafo. O le ala lena o lea e tau faapaleni atu nei mea, ae lafo maia, lafo maia o lo o taumafai pea le Matagaluega o Tupe, e le tau faafuluina foi o tama fanau a le atunuu, ua lava le tomai, a o lo o faapena ona ave le tuualalo e talafeagai ma i latou. Ia ma le taumafaiga a le uluai tausala ua tulai i le Minisita o Tupe e tauave a tatou tupe mo lenei taimi.

FOFOGA FETALAI: Ua i ai le manatu ua...

Afioga Hon Tapunuu Niko Lee Hang: Lau Afioga i le Fofoga Fetalai.

FOFOGA FETALAI: Ua tatau ona faamuta lea tulaga lau Afioga i le sui usufono mamalu. O le a tele le tatou taimi e alu, o lea ua malamalama, o lea foi ua oo a outou fautuaga i le Minisita o Tupe.

Afioga Hon Tapunuu Niko Lee Hang: Na o le fia momoli o le faafetai i le Afioga i le Minisita, ona o lea e foliga mai e eseese lipoti ia e tapena, e ese mea e aumai iinei, ese mea e ave i le UN. Ae o lau tuualalo, faamolemole e tapena se lipoti e tasi, ia consistent ai tatou faamatalaga ia e ave i fafo ma aumai iinei i le Palemene, ma lou faaaloalo lava.

FOFOGA FETALAI: Ia lelei, o lea ua...

Susuga Hon Laauli Leuatea Polataivao Fosi: E i ai si mea lea e faamalamalama ne i te i ua faanunumi foi lau tala na avatu. O le mea lene na tatou sau ai Nofoaiga ia na uma. A o le Nofoaiga lenei, o le mea lava e tupu o le mea lene e momoli i o. Ina ua malamalama le aumaiga o le fautuaga a le UN, o le mea lea e tatau ona alu ai Samoa. Ma lou agaga faaaloalo.

Afioga Hon Faualo Harry Jeffrey Schuster (Minisita o Leoleo ma Falepuipui): Lau Afioga i le Fofoga Fetalai, e na o se manatu lava...ae tatou te finau lava i le mea e tasi. Ae a tatou tilotilo i le avanoa lea fai o le miliona tala lea e tau tulituli ai, e pei foi ona saunoa i le GDP ma le Standard of Living. Lau Afioga o lea tatou te iloa uma lava, na tatou ola uma lava i Samoa. E faigata ia ona faatutusa le fai pisinisi i le taulaga ma le faifaatoaga i Aleipata ma Falealupo. E mafua lau afioga, o le tele lava o le afaipisinisi lea e i ai nei, e i ai a latou aseta, fanua, o aiga na ola.....e faigofie ona alu i le bank e aumai le loan. O le avanoa la lene e le taitai ona maua e le faifaatoaga la e i Falealupo ma Aleipata, pe afai o oe o le taulealea lea e te fia ola, aua e pule le matai i le faasoaina o le fanua. O le a lau taumafaiga lea e taumafai, e te ui muamua i isi tulaga, ae e te oo atu foi la i le mea tau loan, ua fai mai le faletupe e le mafai ona avatu se loan i fanua Samoa. O lau tilotilo lene i le taumafaiga lea e taumafai i ai i le miliona lea ma le GDP ma le Stanadard of Living, o le ave lava o avanoa i nai o tatou tagata. E le o i ai le avanoa i le taimi lenei e atiae ai, tuu sao atu lava i ai, o le a lau pisinisi lene e fia fai, o le avanoa lenei e fai ai. E te le alu e tau sue mai se guarantor, o le tele o...o tatou uma lava, e i ai o tatou tei e manao e fai le loan e fai ai le mea lea, e guarantee e oe. Ae e vaai atu o le a e liu aisa i i ae uma ifo ona guarantee ae le mafai e lou te i ona totogi le loan, oki ai oe, ona e fai atu lea,

malie lou loto e le mafai ona ou totogia lau loan. Ae o le avanoa lea ua maua i i, i le miliona. Faafetai i lau Afioga i le Fofoga Fetalai.

FOFOGA FETALAI: Ou te iloa o lea ua malamalamagia lea mataupu, ua ou manatu foi...

Susuga Maulolo Tavita Amosa: E toe tasi lava si mataupu lea faamolemole lau afioga pe a talafeagai ma lou finagalo.

FOFOGA FETALAI: Ua tele fautuaga ua ave, e talitonu foi o lea ua logona foi e le Minisita ma le Matagaluega ia fautuaga. O lea e matau atu le Nofoa, o le mea lava e tasi lea tatou te talanoa ai, ae ua leva ona faamaumuina e le Minisita.

Susuga Maulolo Tavita Amosa: E pau lava lea o le mea na fia faasao faamolemole. O lea e matau atu ua see ese ma lau fesili na mafua ai le mea lenei. O le faigofie ia o lau fesili. O lau fesili, e tatau ona o faatasi le relationship, afai ua alu i luga le GDP alu i lalo le Poverty line, o le faigofie ia. Ae a faapea o se taimi oi luma, sau o le a mafai ona oo i se tulaga ua faapena faafetai, ina ia malamalama tagata uma. Aua po o le a ma le a le taua o nei mea tatou te faia... O lau fesili e fesoasoani i le tatou poloketi lea o le miliona, e pau lea o se mea sa ou tu atu ai. Ua uma foi i i se manatu ou te le toe tulai.

FOFOGA FETALAI: O le mea lava e tasi lea tatou te taamilomilo ai, se i saunoa mai lau Afioga i le Minisita.

Afioga Hon Faualo Harry Jeffrey Schuster (Minisita: E eseese uma lava o tatou manatu, a o lou lea manatu i le fesili lea. O le faigata ia ona faapea e tali atu, tali faafaamasino, e tauto o le... le mea lea i le saunoaga a le sui usufono mamalu. I le tau faapea a alu i luga le GDP ona alu foi lea i luga le Poverty Line e faigata. I le lalolagi atoa, e tasi le pasene o le au mauoa i le lalolagi, e latou te own ina uma le tamaoaiga o le lalolagi atoa. E faapena foi atunuu taitasi, o le au milionea a Amerika, a tele le alu i luga, o le mea lenei lea na ou fai atu ai nei lava. O le avanoa e atinae atili ma fai pisinisi, o lea e uu e le tasi pasene. A mativa lava le tagata la e i o, e le maua le avanoa e alu ai i luga, e mativa ai lava i lalo i o, seivagana ua fai ni fuafuaga a le Malo i se auala e tau aumai ai i luga. O le taumafaiga lenei o lea e fai atu nei, ae o se upu e faapea e fai atu, a alu loa GDP ma fai atu ua tatau foi la ona alu i luga le... e faigata. Ma e le o se fact foi lea e faapea o se mea mautinoa e tupu, ma o le taumafai e sii i luga nai o tatou tagata ia i lalo. Ae le mafai ona faapea a alu loa i luga le GDP o Samoa le toe i ai se tagata mativa. E faigata ona fai lenei mea.

Afioga Hon Toelupe Poumulinuku Onesemo (Minisita o Fesoootaiga ma Faamatalaga Tekonolosi): Lau Afioga i le Fofoga Fetalai, e fia fesoasoani lava i le tulaga lea, aemaise e tali sao lava i le fesili. O le agaga lena o le Vaega Faaupufai a le FAST, e galulue faatasi. O lau mataupu o le tulaga tau information, o le mea la lea. O le taua lena o lenei taeao. E faafetai i le sui usufono o Sagaga, le faamanatu. E masalo o lea o lo o misi, na lauga foi le sui usufono o Sagaga i le tulaga tau unemployment. O le isi lea auala e spread ai le wealth lea e ala ai ona tupu le inequality lea ona ua wealth ia tagata pito i luga, ae le spread i tatou unemployment. O lo o send nei tatou tagata i fafo, ona e le o lava le tulaga tau employment. E na o se fesoasoani atu faapena. Ma le agaga faaaloalo.

FOFOGA FETALAI: Ou te iloa ua lava ma totoe ia faamalamalama.

Afioga Hon Lautafi Fio Selafi Purcell (Satupaitea): Lau Afioga i le Fofoga Fetalai.

FOFOGA FETALAI: O fea e agai i ai lau faauilavea le sui usufono o Satupaitea.

Afioga Hon Lautafi Fio Selafi Purcell: O le saunoaga a le sui Minisita.

FOFOGA FETALAI: E leaga e le o lauga...

Afioga Hon Lautafi Fio Selafi Purcell: O le mea e fia faasao lau afioga. E leaga ua alu lava le aso ananafi ua ou nofonofo, ua leai lava sou tautala. Sa toa lava le vaa o Satupaitea, tuu pea e fai pea saunoaga. A o lenei foi taeao, o le manatu lava lea, e tatou te galulue faatasi, o le agaga lena o lenei sui usufono, tatou galulue faatasi. Ae i ai lava faamatalaga e sau, e pei e le oso ai se fia galue faatasi. Leaga ua 2 au Paeaiga faa-Minisita lau afioga. Ae sa saunoa le uso ia Laauli po o Asiata, o le isi foi Satupaitea, e faapea. O faamaumauga ia e ave i fafo, e ese ma faamaumauga ia e aumai i i, ona faapea mai lea o lana saunoaga, o mea ia sa fai i Paeaiga ua tea. O lea ou te fai atu, e talu ona ou Minisita, ou te mautinoa e leai se mea faapena na tupu. O lo o i ai a tatou Matagaluega o le latou mataifaioi ma le tomai faapitua lena. Afai la o silafia o i ai ni mea faapena na tupu, o le Maota lenei e aumai e faasao ai. Ma tatou tilotilo po o sao le faiga o mea ia tatou te talanoa ai. Aua e i ai foi taimi e ese lava information e manao ai fafo, ese information o lea e tuu iinei e eseese aoga o information.

FOFOGA FETALAI: Ia faafetai o lea ua maua atu lou finagalo.

Afioga Aliimalemanu Moti Momoemausu Alofa Tuuau (Sui Tamaitai o Alataua Sisifo): Lau afioga i le Fofoga Fetalai.

Susuga Hon Laauli Leuatea Polataivao Fosi: Lau Afioga i le Fofoga Fetalai ou te ava tele atu, ae sei ta le break ou alu atu lea avatu faamaumauga ia oe Lautafi. Ou te le soona faia se upu, ua e silafia ua tuuai soo au i le mea lena iinei i le Maota. Laauli talk on the proof, e mafai ona ou avatua. O lea e i ia Olo, na matou saofafai toafa mai o, na tatou finau ai i le Nofoaiga lena i le mea lena. Po o le faamalamalama lena e le tau aumaia, ou te musu ta te felauai, ae o lo o nonofo lo tatou itumalo.

FOFOGA FETALAI: Se i tulai mai le Sui Palemia.

Afioga Hon Tuala Tevaga Iosefo Ponifasio: Lau Afioga i le Fofoga Fetalai, e faatalofa atu i lau afioga aemaise o le Maota i lenei taeao. Ua agai lava i le lautele ia saunoaga a sui usufono mamalu. Ae tulituli atu lava le agaga o le paketi lau Afioga ma le sini autu o le Tala Faatatau o le Tupe. O lea lava e tau faamatala mai e le Minisita o Tupe le agaga ua ala ai ona taoto mai le Tala o le Tupe i le tulaga ua i ai nei, e pei foi ona otooto atu e lenei itu. Ae o lo o faapena ona fesiligia e lena Itu o tulaga masani lava. E mafua ona tatou felafolafoai i le taeao i le mataupu lenei, ona o le fesili mai le sui usufono o Sagaga 2, ona ua faapea ua alu i luga le GDP ae ua sau i lalo le Poverty line. O lea ua maua lou finagalo na faaalua, ae foliga mai foi ua e tuuaia tulaga o faamaumauga a lo tatou Malo, ia pei o i ina lea ua taoto ai lou finagalo o lo o i ai le feeseeseaiga lea. Ae e matau atu foi, e te le o tuuina mai ni faamaumauga e tau ina lagolago ai le tulaga ua e aumai i le GDP i lona alu i luga ma le Poverty line i lona alu i lalo. Ae sa ou faapea lau Afioga,

Susuga Maulolo Tavita Aмоса: Lau afioga o le mea e fia faasao faamolemole.

FOFOGA FETALAI: Lau afioga se i maea le saunoaga a le Sui Palemia.

Afioga Hon Tuala Tevaga Iosefo Ponifasio: Ae sa faapea o le a tuu lava le avanoa i le Minisita o Tupe, o lea ua taumafai atu ia, e faamalamala nisi o vala, ua ala ai o tulai mai le vaega lea o le mativa. O lea foi ua saunoa isi ou uso a Minisita e tau faamalamalama ma tau faapupula nisi o mafuaaga. Ae o le tulaga sa i ai foi le vaega o le paketi sa galulue ai foi le Malo talu ai. E ese foi le latou vaaiga i le aotelega o le tamaoaiga ma le faatulagaga o le faasoa. E ese foi le vaaiga a lenei Faigamalo, o lea foi ua tuusao atu lava le sini autu o le paketi, o le faamaite. O le faamaite o mafaufauga fou, o aikia fou, ina ia maepu ai le tamaoaiga, ina ia aveese ai ma faaititia le tulaga lea o lo o toa ai le eseeseaiga lea ua aumai, le economic equality. E mafua i sea,

le economic equality lea. Ona o le tulaga tonu lava lea ua e aumai, o lo o i ai le faasoa sa i ai, e pei e... vaapiapi le tulaga lea, e le o oo le faasoa i totonu o tagatanuu. O tatou tagata o lea ua omai le Malo lenei, sui ina ia faasafua le faasoa, ia faasafua le manuia i o tatou afioaga aemaise nuu, aiga ma ekalesia. O lea ua faamalamalama atu e le Minisita o Tekonolosi, le tulaga le o le distribution of wealth. O le mafuaaga lena o lea ua i ai le vala lava po o le economic gap. Ua i ai e ua mafai ona faatino le tulaga o pisinisi, o lo o i ai le tamaoaiga o lo o i ai le tomai, e saili ai lo latou tamaoaiga ma le latou manuia. Ae o lo o i ai e i lalo i i, e le mafai ona latou sailia, ia tulaga ia e pei ona gafatia e nisi o le aufaipisinisi ma e o lo o oo i ai le faasoa. O le mafuaaga lena ua i ai le economic gap lea, o e e i ai, ma e le i ai. o le mea lea ua create le mea lea ua taua, ua saunoa i ai le Tamaitai lea, o le economic inequality. O lona uiga ua i ai se tulaga ua le laugatasia se tamaoaiga i le faasoa o se paketi sa i ai.

O lea la ua faamanino i le taeao lenei, ua faamaite e le Malo fou le tulaga lea, lea ua alu le miliona, e le toe fesiligia le tulaga lena. O le agaga la o le paketi, faasoa ifo e outou pe faapefea ona faatino ma faamanuiaina le miliona lea, ina ia aumai ai i luga le...ma aveesea le mativa lea e taua soo. E i ai lagona ma le autu o le Malo lenei, o le miliona lenei o le a fesoasoani e eleviate ma taumafai ma siitia ai le tamaoaiga o tatou aiga, o tatou nuu i tua, aemaise e o lo below poverty line or above the poverty line. Ae faamalie atu i lena Itu, tatou o i le agaga o le paketi, o le tele ia o mea fou lea e i totonu o le paketi o mafauauga fou, o lena ua tuu atu i totonu o le paketi. Sa tatau ona outou saunoa mai ai, ma tatou fale ai, o i ina lea e maua atu ai le matou sini lea, ia faamaite mea fou. Ia tatou o e saveu i luga le tamaoaiga, aua e taamilo taamilo, o lea ua alu i tua, e foi mai lava i le Matagaluega lenei o Tiute ma Tupe Maua, matou te toe tapa lava si vaega o le lafoga lea o le a maua mai tagata faigaluega, le VAGST ma kamupani, e toe maua mai lava le tupe a le tatou Malo. Ia silasila i le itu positive o le tatou paketi faamolemole. O le tala lea manuia le tatou Fono.

Afioga Hon Tapunuu Niko Lee Hang: Lau Afioga i le Fofoga Fetalai...

FOFOGA FETALAI: E i ai le manatu lau Afioga i le sui usufono mamalu, o lea ua saunoa le Sui Palemia o le sui o le Malo, e manatu foi ua tele a tatou talanoaga ma fautuaga i lenei mataupu. O le aoga foi ona toe fai ni lafoga fetuituia i totonu o le tatou Maota, a o lea e faatali le Minisita mo le faaauauina o lana saunoaga. O le mea lea, o lea ua saunoa le Sui Palemia o le Taitai o lea Itu o le Malo, o fuafuaga tatau na a le Malo mo le agai i luma.

Afioga Hon Tapunu Niko Lee Hang: Lau Afioga na o se mea e toe faamalo atu ai i le saunoaga a le Minisita o Tupe ma le saunoaga ia ma le saunoaga a le Sui Palemia...

FOFOGA FETALAI: Ia outou utagia foi le faatonuga a le Nofoa, le afioga i le sui mamalu. O lea ua avatu le fautuaga a le Nofoa, se i faaauau le saunoaga a le Minisita o Tupe, se i maua foi se isi avanoa ona toe maua foi lea o se isi avanoa.

Afioga Hon Tapunuu Niko Lee Hang: Lau Afioga e pei na o le pau lea o le avanoa, ona o lea ua saunoa sao mai le Afioga i le Sui Palemia.

FOFOGA FETALAI: E leai e te le agai i le Sui Palemia, agai i o i le Minisita o Tupe, o le tatou Tulafono Tumau.

Afioga Hon Tapunuu Niko Lee Hang: Ua ou faaaloalo atu i lau Afioga, faafetai mo le avanoa.

FOFOGA FETALAI: Le sui usufono o Sagaga 2, o lea ua malamalama ma manino lau mataupu.

Susuga Maulolo Tavita Amosa: O le a ou usitaia lou finagalo, e ui lava ina lagona le faanoanoa ua tuuaina au e le Sui Palemia, faapea ua ou tuaina faamaumauga. E pau lava le mea na ou tulai atu ai, ona e i lalo o tatou Tulafono Tumau ia, o le mea e fia faasao. E pau lava...ae afai o lea, tatou faapea ia ona fai.

FOFOGA FETALAI: Ia malo faafetai. Lau Afioga i le Minisita faaauau mai lau saunoaga. E tele fautuaga lea ua avatu i lau Afioga ma le Matagaluega.

Susuga Hon MULIPOLA ANAROSA ALE MOLIOO: E faafetai i lau Afioga i le Fofoga Fetalai. Ma e taua foi outou finagalo ma manatu ua tuuina mai. E pei lava ona malie i le tatou sini autu e tatou te folau faatasi. Ua outou tuualalo mai, ua fautua mai, e poupu ai foi lo tatou sa aua le agai i luma.

Lau Afioga i le Fofoga Fetalai, o le a seu lou sa i fanua, e talitonu foi ua maea ona faamaioio tali ma fesili e pei ona tuuina mai. Ae le i seu lou vaa i fanua...

Susuga Maulolo Tavita Amosa: Lau Afioga i le Fofoga Fetalai...

FOFOGA FETALAI: E i ai se isi mea o totoe po o

Susuga Maulolo Tavita Amosa: Lau Afioga i le Fofoga Fetalai, o lea ua tali fesili uma sa laga, vagana ai le mataupu sa ou laga, pe i ai se avanoa faamolemole.

FOFOGA FETALAI: O le a le mataupu lea e te taua.

Susuga Maulolo Tavita Amosa: O le mataupu lea sa ou laga, i le manaia o le faamaite ua i ai, ae tatau foi ona faamaite ina ia faasoa avanoa tutusa i totagi o le afaigaluega a le Malo. Afai e i ai lava le tulaga taua lea se i ou fesoasoani atu ai. E ogaoga le faamaite ma e ese le manaia ma le matagofie, e pau lea o le mea. E i ai le mea e tau o le sense of ownership.

FOFOGA FETALAI: Ua felavasai a tatou Fono ona o le sui usufono lea o Sagaga. Ua taatia fautuaga i o, o la ua faamau lelei e le Minisita. O lea ua maua lelei sa e taua i lau lauga muamua le tulaga lea. O lea foi ua tali mai....

Susuga Maulolo Tavita Amosa: O le a seu ia i uta lou vaa pe a fai o lea, e tumu au i le ava.

FOFOGA FETALAI: O la foi e tali mai le Minisita o la ua faamau lelei fautuaga.

Afioga Hon Tuala Tevaga Iosefo Ponifasio: Lau Afioga i le Fofoga Fetalai ou te fia tali atu i le fesili lea.

Susuga Maulolo Tavita Amosa: O lea sa tau avatu le tuualalo e taua mo le faamaite lea, ina ia manuia atili. E pau lava lea, e le o se faitioga, o le mea lena sa ou taumafai i ai, ina ia create se sense of ownership, i vaega uma o le community, ma le public sector ina ia galulue faatasi. O lea tou te aumaia le mea lea o le galulue faatasi, a o le mea taua, o ai tatou te tua i ai? Na saunoa anapo le Minisita lea, o le mea lea e tau o le Monitory and Evaluation, o ai e tua i ai? O le afaigaluega a le Malo. O ai tatou te tua i ai le....ma isi mea.

FOFOGA FETALAI: Taatia mai... O lea ua maua lou finagalo

Afioga Hon Tuala Tevaga Iosefo Ponifasio: Lau Afioga i le Fofoga Fetalai, e lelei lava ona ou tali atu i le taimi lenei...

FOFOGA FETALAI: O lea ua maua lou finagalo, alala mai lalo le sui

Susuga Maulolo Tavita Amosa: Ae ui i lea, measili lea na ou tali atu i le Minisita o Tupe ae le o lau afioga. Se i tau totoa mai lau afioga ona manaia lea o le tatou aso.

Afioga Hon Tuala Tevaga Iosefo Ponifasio: Lau Afioga i le Fofoga Fetalai, e taua le fesili lea na tuuina mai. O lea lava e taumafai atu lau afioga i le sui usufono mamalu. O le fesili lea e patino tonu lava i le Matagaluega o le PSC lea o lo o Minisita ai le Afioga i le Tamaitai Palemia. O lea la ua ou tapena le tali mo oe. Ae malie se i oo i lena taimi, ona avatu lea o se folasaga manino atonu o le a faamalieina ai foi lau afioga. Ae ua le tali le Minisita o Tupe, ona o lea o le a ou tali atu i le vala lea. Faafetai lava.

FOFOGA FETALAI: Faaauau lau saunoaga lau afioga i le Minisita o Tupe.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, e fia maua se avanoa, ou te agai i o i le Minisita o Tupe.

FOFOGA FETALAI: O lea ua faaii mai le saunoaga a le Minisita o Tupe.

Tofa Hon Lauofo Fonotoe Nuafesili Pierre Lauofo: A foi o le mafuaaga lena o lou tulai atu, o lea ua ou faalogo atu ua faaii mai.

FOFOGA FETALAI: Ia saunoa mai...

Tofa Hon Lauofo Fonotoe Nuafesili Pierre Lauofo: E leai o le mataupu lea sa ou laga lea sa afea i lana saunoaga. I mea o le vaega o Forensic Auditors, lea e i lalo o le paketi o lana Matagaluega, ia le \$500,000, afa miliona e faatino ai suesuega ia. O lea la ou te fia fesili atu, aua o lea sa saunoa anapo ma aumai taiala, e faaoga e latou o le a o e suesue. A o lea foi e faasalalau e latou o le a o e saili nisi. O lea la ou te fia fesili atu ai e fia malamalama, po o a ia mataupu ia o le a o e suesue. Se i saunoa mai po o a tonu ia suesuega ia, a o fea e agai i ai suesuega o le polokalame lea, ua ou vaai atu ua faataoto mai i lau Matagaluega. E pei o le vaega lea e fia faafesili atu ai, leaga ua ou faalogo atu ua faaiiui le saunoaga a le Minisita.

FOFOGA FETALAI: E masalo o lea sa tolaulau uma lava e le Minisita ia mea o lea o le a agai i ai suesuega ia. Se i saunoa mai lau Afioga i le Minisita, lea sa maua atu e le Nofoa. O le umi ia o lau tolaulauga o le mataupu lea o le a agai i ai suesuega.

Susuga Hon MULIPOLA ANAROSA ALE MOLIOO: Lau Afioga i le Fofoga Fetalai, atonu o lea ua felavasai solo fesili i le tatou Maota, ae o lo o taumafai lava e tau talitali atu. Atonu o le faafesili a le Sui Taitai o le Itu Agai, ia atonu o lea ua maea ona ou faamanino vaega uma, e faavae ai le sailiiliga, po o le tatou forensic audit or investigated audit. Ua uma foi ona ou faailo vaega uma, i le omai i totonu o le tatou Faigamalo. E 40 tausaga o tulai mai le tatou Faigamalo. O vaega ma lesona taua e maua mai totonu o tatou suesuega taua ia. O le a tapena ai foi le tatou Faigamalo i ni lesona taua e tulai mai. Atonu e i ai se taimi, ona faailo laia, ae taua pea, e le tau faailoa foi nisi o tatou atinae.

Tofa Hon Lauofo Fonotoe Nuafesili Pierre Lauofo (Anoamaa 2): Lau Afioga i le Fofoga Fetalai, e faigofie lava lau fesili. O a mea ia e o le forensic e suesue? E pau lava lea o lau fesili lea e fesili atu ai. O a Matagaluega? o a mataupu? o ni atinae? po o a mea laa o e suesue.

FOFOGA FETALAI: Saunoa mai lau Afioga i le Minisita.

Susuga Hon MULIPOLA ANAROSA ALE MOLIOO: Ia onosai mai lau Afioga i le Sui Taitai. E atoa le aso lenei o lau atu atinae ia o lo o i totonu o le tatou Forensic Audit. Ae o lea o le a ou faailoa atu se tasi o atinae.

Tofa Hon Lauofo Fonotoe Nuafesili Pierre Lauofo: Ua lava ia se tolu e tau mai.

Susuga Hon MULIPOLA ANAROSA ALE MOLIOO: O le atinae e tasi, o le atinae lea i le tatou malaevaalele i Tiavea. Atonu e tele miliona na sasaa i ai, ae o lea lava tatou te le o iloa, po o ai tonu, o ai la e manuia ai. E tau ina ou faapena atu, o lo o i ai faamaumauga a lo tatou Faigamalo, ua maea foi ona faamaonia i luga o le Kapeneta, atonu o le a outou silasila ai foi, i atinae o le a faatinoina ai lea sailiiliga.

E talitonu lau Afioga i le Fofoga Fetalai, ae le i seu lou sa i fanua. E taua lava le....

Afioga Aliimalemanu Moti Momoemausu Alofa Tuuau: Lau Afioga i le Fofoga Fetalai,

FOFOGA FETALAI: Ia se i tulai mai, e i ai se mea o...

Afioga Aliimalemanu Moti Momoemausu Alofa Tuuau: E faafetai mo le avanoa, lea ua matau atu o le a na ua fai mai le faafetai, faaiu ai le saunoaga a le Afioga i le Tamaitai Minisita, sa le faalavelave lava. A o se mataupu na ou laga i le fiscal strategy lea sa e tali mai ai ananei, e faasao mai e leai se

linkage po o se fesootaiga, ma sustainable development goals, a o lena e maua i le taiala mo le lumanai manuia o Samoa le PDS lea e 5 tausaga. O le agaga o le tuualalo na avatu ina ia fesootai a tatou documents ia e 3. E manatua foi o le SDG e filter mai ai i lalo le tatou PDS, taiala mo le lumanai Samoa, ona sau loa lea i lalo i le tatou Fiscal Strategy lea e tasi le tausaga. E tataua la ona fesootai, aua a fesootai na o mea na e 2, ae misi le Annual Work Plan lea tatou te galulue ai, ia ona le mafai lea ona tatou galulue agai i goals ia e 17. o le tuualalo.

A o maua lava lou avanoa lau Afioga i le Fofoga Fetalai, na ou matauina le felavasai o le faaaogaina o le upu lea GDP i le Maota, a o lea e faafofoga le atunuu. O le GDP e fua i ai le tamaoaiga, e le fua i ai le social progress, po o le soifua manuia o le atunuu. E lei faia measures ia e fua i ai le mativa po o le soifua manuia o tagata nuu. E le fua foi i ai le soifua maloloina ma le aoaoina lelei, lea na maua mai e le afioga i le Minisita o Faatoaga. E leaga ua faalogo atu i le faaaogaina...manu lava o maua lou avanoa, e pau lava lena o le mea o lo o fia faailoa, ona ua ese le tulaga ua faaoga i ai le GDP e le Maota. Ma lou faaaloalo lava faafetai.

FOFOGA FETALAI: Ou te faamalulu atu i le sui usufono mamalu, ua maea ona saunoa le tatou Maota i le itu lea. O lea ua tatou pasi i tua ma le mataupu lea....ia faafetai. O le measili lea o lea ua aumai foi tuualalo, a sui o Tamaitai a Tina e fesoasoani foi i lau afioga ma le Matagaluega. O tuualalo lava mo le manuia o le tatou atunuu aemaise o fesootaiga. E manaomia foi lo tatou galulue faatasi, o a outou afioga o lo o i totonu foi o le tatou Komiti, e faapena e manaomia foi lo tatou galulue faatasi, ina ia fesoasoani foi i le Tamaitai Minisita ma le Matagaluega. Ae aoga uma lava fautuaga, o lea foi ua aumai tuualalo a lea foi Itu, lau Afioga i le Minisita, talitonu o avanoa ia e galulue faatasi pea mo le manuia o le atunuu. Ae faauma maia lau saunoaga ua maea lou taimi.

Susuga Hon MULIPOLA ANAROSA ALE MOLIOO: E faafetai i lau Afioga i le Fofoga Fetalai, e taua uma lagona ma tuualalo ma fautuaga, ma o le a faamauiina mo le tatou agai i luma. Ae aua ne i toe faalavelave mai se isi, o lea o le a taualuga lau folasaga.

I le vaaiga i le tatou paketi, e matauina e tasi le tatou Matagaluega o lo o faalagolago uma ai Matagaluega uma, o le Matagaluega o Tupe Maua. Ma o lea ua ou taulimaina, ia le Tala Faatatau Autu o le Tupe iTupe maua i tausaga 2021/2022, ma ua matauina ai le tupe ua mafai ona aoina e le tatou Matagaluega o Tupe Maua. O le taimi lenei e tusa ma le 99% e na o le 1% e le i mafai ona aoina e atoa ai le tatou \$635 miliona, e pei ona i ai i totonu o le tatou Tala o le Tupe 2021/2022.

O le avanoa lea ou te faaleoina ai le agaga o le faafetai i lau Afioga i le Minisita o tatou Tupe Maua, aua e taua tele, aemaise foi o le tatou

Matagaluega o Tupe Maua. E le mafai ona tulai mai ma faatupeina ia paketi a tatou Matagaluega taitasi, pe a le faalagolago atu, i la outou galuega. E momoli ai le agaga o le faafetai. E faaleoina foi le agaga faafetai i le Taitaifono o le Komiti o Tupe ma lau Komiti, e tusa ai foi o le tou gapatia, aemaise foi o le silasila manino i le tapenaga o le tatou Tala o le Tupe. A o a foi ni fautuaga e tuuina mai i luma o le Palemene.

E le faagaloina lau Matagaluega o Tupe, o e o lo o galulue i le ao ma le po, i le taumafai e tuufaatasia le Tala o le Tupe, ina manino, ina ia maiio ma ia talafeagai foi ma taiala ua tuuina mai e le tatou Palemene. E le gata i lea, e faaleoina lau faafetai i le Finance Sector, le Kovana a le Central Bank, o le SIFA o lo o tele foi lona sao i totonu o le tatou paketi. O le Faletupe o Atinae, o le tatou Ofisa o le SLAC, o le UTOS, NPF, faamalo i la outou tapenaga ma la outou tapuaiga.

E le faagaloina ia au faufautua o lo o faapena foi ona tuualalo i le tele o taimi. E pei ona tuuina mai i le tele o taimi e manaomia ai le fesoasoani.

E i ai le talitonuga, e i ai lape o lou tulai atu i le tele o taimi. Ae faamalulu atu Samoa aemaise foi lau Afioga i le Fofoga Fetalai, o le Maota o le Palemene, o le a se leo ua le tautamalii, ua le logomalie foi i lau faafofogaaga, e talitonu ou te matua atu i ina.

Ae lau Afioga i le Fofoga Fetalai, e faaleoina pea le agaga o le faafetai e tusa ai foi o lou tulai i le foe e taitai pea le sa folau a le tatou Palemene lea ua mafai ai ona toai taunuu mai i lenei itula. Ma le agaga faaaloalo, faafetai.

FOFOGA FETALAI: Ua faamalo faafetai, malo tofa i lau Afioga i le Tamaitai Minisita, ua faafofoga foi ma le totoa le paia o le Maota aemaise o le faafofoga a le atunuu. Ou te talitonu lava leaga o lau Afioga o le auga o aute aua foi lenei Fono ona o le Tala o le Tupe. O le mea lea, malo saunoa, faafetai foi le lototele ma le onosai, aemaise foi o le tele o fautuaga ua avatu e le tatou Maota. E talitonu lava o le a vaatele lou finagalo aemaise foi le Matagaluega aua lava le agai i luma ma le tapueina o le tatou tamaoaiga. O le mea lea, malo le onosai faafetai foi i lou talilemuina foi o finagalo ma fautuaga a le tatou Maota. Ia o uiga lava ia o mea tau tupe, e talitonu lava e tele foi fautuaga taua ua tuuina atu e le tatou Maota aua le poupuina o le Matagaluega mo le agai i luma aua le tamaoaiga o le atunuu. O le mea lea, malo faafetai. Malo tapena, faafetai foi i le Ofisa Sili o Pulega ma le Matagaluega o Tupe aemaise foi i latou sa galulue mo le tauaveina ma le taumafaiga o le tatou Tala o le Tupe. O le mea lea, malo faafetai.

Ia, ua oo mai le tatou faasologa i lau Afioga i le Minisita o Leoleo ma Falepuipui ma Tinei Mu ma Faalavelave Tutupu Faafuasei. Lau Susuga Honourable Faualo.

Afioga Hon FAUALO HARRY JEFFERY SCHUSTER: Faafetai tele i lau Afioga i le Fofoga Fetalai mo le avanoa. E momoli atu foi le faamalo i

lau Afioga mo le faafoeina o le tatou Fono. Lau Afioga, e fia ofo alofa ma faatalofa atu i le Afioga i Le Ao Mamalu o le Malo ma Lana Masiofo, le Afioga i le Sui Tofia, le Afioga ia Le Mamea Tuiletufuga Ropati ma lou faletua.

E faatalofa atu foi i lau Afioga i le i le Sui Palemia ma le mamalu o le Kapeneta, Minisita Lagolago ma sui usufono o lenei Itu o le Malu, faapea foi lau Afioga i le Sui Taitai o le Itu Agai ma le mamalu o alii ma tamaitai sui usufono o lena foi Itu o le Malo.

E faatalofa atu foi i lau Afioga i le Faamasino Sili, le Peresetene o le Faamasinoga o Fanua ma Suafa, le mamalu i Alii ma Tamaitai Faamasino ma le mamalu o le afioga i le Tamaitai Resitara ma le mamalu o le aufaigaluega.

Ia, e faatalofa atu foi i le paia o si o tatou atunuu, le paia i Tama ma Aiga, o Aiga ma latou Tama, Tumua ma Pule, Ituau ma Alataua, Aiga i le Tai ma le Vaa o Fonoti.

E faapea foi ona fia faatalofa atu ma ofo alofa atu i le paia i ositaulaga o si o tatou atunuu o lo o nofo tatalo mo se manuia o Samoa, Samoa uma lava o lo o aalala i Samoa nei faapea foi ma atunuu i fafo.

E fia ave foi le faatalofa ma le faamalo i le tapuaiga a nai o tatou uso i Tutuila ma Manua, i le afio o le Kovana ma le Sui Kovana, le Fofoga Fetalai ma Sui o le Maota, le Peresetene ma le Senate. Ia, o le paia lava lea ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, le Laau na Amotasi, Faatuiolemotu, Tootoo o le Faleula, Faleagafulu ma upu ia te oe Tuimanua.

E faatalofa atu foi i le paia ma le mamalu o le aufaigaluega ma Ofisa Sili o Pulega o Matagaluega ma Faalapopotoga a le Malo ua tatou faatasi i lenei taeao. Malo lava le tautua, malo le galulue.

O nai fesili ia sa laga foi e sui o le Maota i le Matagaluega o Leoleo ma Falepuipui ma le Toefuataiga, Komisi o Faiga Palota faapea foi Tinei Mu ma Fesoasoani Laveai.

O le Susuga i le sui usufono mai Faleata 4 le Igoamatua ia Ale, sa ia laga se mataupu lea, pe le mafai ona tatou tilotilo ona o le tele foi ia o tatou faamasinoga e uma tatou faiga palota tatou agai i le isi fale paepae lea ona faatoa maua ai lea o sui o le fale paepae lenei. Ia o lea sa faatu mai le manatu e le sui usufono pe le mafai ona tatou tilotilo i se tulaga foi lea e faataga se aofaiga tupe e fai ai le campaign ae faasala la oe pe a e ova atu. Ia o se tulaga foi o la e fai e isi atunuu e faataga le mea lea, e i ai foi le lipoti foi lea e lipoti e le Komesina o Faiga Palota le aofaiga o campaign funds.

Sa laga foi e le sui usufono mamalu le tulaga lea i le Tulafono lea ua i ai tatou sui usufono o le Maota, e tapu na o tatou lava ia tagata foi lea o le ituaiga galuega lea tatou te i ai o sui usufono, na o tatou lava lea e tapu ai le aiatatau lea i totonu ole Faavae e mafai ona e faipaaga ma so o se isi lava e te finagalo ma lua malilie i ai, e faataga e le Faavae le mea lena. Lea la e i ai

le tulaga foi lea o le asosi a loia, fomai, e taga uma lava le au vaega lena, le au suetusi, e i ai foi Ekalesia. Ae na o tatou la o sui usufono o lea e tapu ai le aiatatau lena e uma loa ona fai lau tautoga i lau Vaega Faaupufai e te i ai, ia, o lea la ua tapu lou alu... sa muamua sa tapu e taga lou me i ae te mei i le Tutoatasi, e le mafai ona e me i i se isi Vaega Faaupufai. Ia, e manaia lava le manatu faatu e le Afioga i le Igoamatua. Ia, na o se manatu lava o au ia faatusatusa. Ou te faatusa le mea lea o le tapu foi lea o lou alu i le isi Vaega Faaupufai pe a e faatusatusa la i le mea lea o lau aiatatau e te alu ai i le Ekalesia, i se Tulafono foi lea, a o tatou la lea... e sa le alu e Tutoatasi, sa foi le alu i le isi Vaega Faaupufai. E taga le aiatatau e pule lava oe i lau lotu e te alu ai, ae a e alu ese la ma le lotu lea e te i ai. Pe a faapea la o au lea e lotu Taiti, EFKS, a ou alu ese ma le EFKS, e sa ona ou alu i o i le Katoliko. E pei o se faatusa foi lea faatauva.

Lau Afioga i le Fofoga Fetalai ma le mamalu o sui usufono, o nei fesili uma, o lea e taatia uma atu i le tatou Komisi o lo o iloiloina le Tulafono, po o le a le Tulafono tatou te folau ai i le isi 60 tausaga. O lea e faatauva ma talosaga ai foi i le paia ma le mamalu o si o tatou atunuu o lo o faataamilo le tatou Komisi i tatou itumalo uma e 51, afio ae ma talaaao ifo e faaali outou manatu. O lea ua tea le isi 60 tausaga i le alofa ma le agalelei o le Alii, ae aumai outou finagalo e poupu ma fau ai se Tulafono o le tatou Faiga Palota mo le isi 60 tausaga i le lumanai.

Ia o se tali faatauva lea i le finagalo foi na faaalua e le Afioga i le Igoamatua mai Faleata 4. Aleipata Itupa i Luga, le Afioga ia Fuaava Suluimalo Amataga Penaia, lea sa e laga le tulaga lea i se Fale Tinei Mu mo Aleipata. Ia o le manatu foi lea sa laga e le sui usufono mo Safata 1 ma le 2, ma le sui usufono o Falealili 1. E manaia manatu. O le tali atu, o lo o tagai le tatou faigamalo ma le Matagaluega i ni tulaga faapea i ni Fale Tinei Mu o tatou itumalo, ae talosaga atu e onosai mai, o la e tau tilotilo e faasolo. Atonu lava i fuafuaga i le tilotilo foi lea e tau faapaleni, a faapea e faatu i Aleipata, ia o se tulaga foi lea e taulalata foi ia aofia ifo ai ma Lepa ma Lotofaga, ona toe tilotilo lea i le isi itu i Falealili, Siumu ma Safata, faataamilo atu i Lefaga ma Samatau ma Falelatai. Ia o lea e i ai le Fale Tinei Mu fou lea o le a faatu i fafo mai o le Malae Vaalele, o le a faapitoa lava lena mo le Itu Aana lea, ona e le mafai i Tulafono a le Malae Vaalele ona faaoga le Ofisa Tinei Mu la e i totonu o le Malae Vaalele e omai e tinei mu i fafo mai o le Malae Vaalele. Ia o si tali atu lea i fesili i lau Afioga i le sui usufono mamalu mo Aleipata Itupa i Luga.

O le sui usufono mai Gagaemauga 2, le Afioga ia Seuamuli Fasi Toma, o lea sa e laga le fesili lea, atonu foi e toatele sui usufono o le Maota o lea e fia fesili i le mea, ona o le tulaga lea i le toatele foi o tagata mai outou itumalo ia e o i malaga ia faavaitaimi. O le fesili pe aisea e 3 aso ai e fai ai le Lipoti, pe faamaonia sou solitulafono, ia po o le a foi le mafuaaga e ala ai ona omai uma i Apia ae le mafai ona fai lava Savaii i Tuasivi. Faafetai i lau Afioga

mo le fesili. O le tali mai a le Matagaluega, e tatau ona mautinoa lelei lava faamaumauga, o suafa o tagata lea e faamau ma le solitulafono lea ua faamaonia. E faaaoga la faamaumauga a le Matagaluega o Leoleo mai le Faamasinoga, ia faapea foi faamaumauga a le Ofisa o le Loia Sili. O lea la e galulue faatasi Matagaluega ia, o le mea lea o lea e fai ai sina tuai.

Ia, ma le tulaga na tau mai na faatu faapitoa lava le vaega lea o le Matagaluega, e i ai foi la leoleo sinia, e faapitoa lava le vaega lea o le auaunaga i le vaaiga o tulaga ia i mea o tagata ua faamaonia solitulafono. Faafetai mo le fesili lau Afioga. Ia o la e fai mai le Matagaluega e 3 aso, ae le tumau ai lea naunau, o le luitau foi lea mo le Matagaluega a Leoleo ma Faamasinoga ma le Ofisa o le Loia Sili i se taumafaiga, tatou agai i luma pei o isi atunuu. E te alu atu lava i le aso lea e te alu atu ai e alu i le counter totogi lau tupe ae aumai lau PC Record. Ia o le luitau lena mo outou i le alu agai i luga, ona e taua le manatu, e faigata le malaga mai Savaii ma tua, e alu le aso atoa. Ia 3 aso, e le taugofie foi, ae o le a taumafai i ai po o le a se tulaga e mafai ona fai i lea tulaga i lau Afioga i le sui usufono.

Lau Afioga i le sui usufono mo Safata 1 lau Afioga Leaana Ronnie Posini, sa e fesili po o ai le afaigaluega lea na aafia i le faalavelave i Tiavi ona e faapea o le galuega e tele mea o piliki ma mea na ave ai i le galuega, a o tagata ia na o e le o ni tagata e galulue i le tulaga lea. Leai o le lipoti mai a le Ofisa, o le galuega o le toe faaleleia o le fale o le pou i Poutasi. O e sa i ai i le vaega lea sa maliliu, e toalua kamuta ma le sikulati, o le au vaega ia e galulue i le vaega o le Matagaluega lea e vaavaaia aseta ma faaleleia fale o le Matagaluega. Sa laga foi e lau Afioga po o le a le mafuaaga na ala ai ona umi o tau taumafai le uluai fesoasoani i le faalavelave. O le lipoti mai a le Matagaluega o le FESA la, e le o le Matagaluega o le... Sa i ai leoleo ae o le FESA lea na pau i ai le tulaga lea ona e matua le faalavelave, na matua mafuli lava le taavale ua oso ese ma le auala, ia o le tulaga foi lea na faigata ai foi ona tau faatino le auaunaga a le Tinei Mu ma auaunaga tau fesoasoani muamua.

Sa laga foi e lau Afioga le tulaga ia mataitu le alu i luga o le aisa i inei i le tatou atunuu. Ia, e le feteenai o ta manatu ma o tatou manatu uma. O se mea tatou te popole uma ai i le tulaga lea o le aisa, pe a o i le tulaga foi lea, e le gata o le tele o tagata e faaaogaina ma faatauina le aisa i Samoa, ae o le a avea foi lea ma atunuu e faaaoga e avatu ai le aisa i isi atunuu.

Ia, o le fautuaga mai le Matagaluega lau Afioga, mai le 2020, 2021, 2022, o faamaumauga la e i ai i raids foi ia a leoleo na alu i tua, o le 2020 e 6 raids na maua mai ai le mariuana, o le 2021 e 7 raids na maua mai ai le mariuana foi, o le 2022 e 12 raids, e 12 foi lea na maua mai ai mariuana. A tuu ifo la i tausaga ia ma le mea lea o le aisa, o le 2020 e 3 osofaiga na maua mai ai aisa, o le 2021 e 1 le osofaiga na maua mai ai le aisa, o le 2022 e 2 osofaiga na maua mai ai le aisa. A o le lipoti mai foi la a le Matagaluega, e le o ni aofaiga foi lea a faatusa mai le 2020, 2021, 2022, o alu foi lea i luga o la e

faateteleina, na o le pau le mea lea o la e maua ae o tamai taga pepa iila foi lea i lalo ae o le 10 kalama, ia lea e faatau foi lea e faaaoga e latou lea e faatauina le aisa. Ae pei foi ona saunoa lau Afioga, o lea sa maua ai foi tagata ia, le sio foi lea o tagata o lea e aafia i le faaaogaina o le aisa. Ma o le tulaga foi lea o lo o mataitu le Matagaluega.

O isi vaega na maua mai osofaiga a leoleo, o le paipa foi lea e faaaoga e ula ai le aisa ma mea foi lea e mafai e tagata ona faaaoga e gaosi ai le aisa. I le 2020 e lima mea faapena na maua mai ai. I le 2021, e...

FOFOGA FETALAI: Ia, ou te faamalulu atu i lau Afioga i le Minisita, talu ai ona o lea ua tatou taunuu i le tatou taimi o le malologa masani o le taeao, o le mea lea e faamalulu atu ai i lau Afioga, toe faaaauau lau saunoaga pe a tatou toe taliu mai i le tatou malologa.

O le mea lea e faasilasila atu ua faataatiaese Galuega a le Fono Aoa mo lana malologa masani o le taeao.

Na faataatiaese Taulumaga a le Fono Aoa Faitulafono mo lana malologa masani o le taeao i le itula e 10:45 i le taeao ma toe faaaauau i le itula e 11:24 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono.

E i ai le manatu ua maea ona tali le sua a le paia o le Palemene le tatou Maota, maua foi se faasiligamalosi e faaaauau ai ia le tatou galuega.

Ia e faataatiaese ia tatou Taulumaga mo le malologa o le taeao o lo o saunoa le afioga i le Minisita o Leoleo ma Falepuipui e talifuaitau foi i mataupu sa laga e sui usufono mamalu.

Tapu lau afioga i le Sui Palemia mo le lafo.

LAFO MO LE FAAAUAUINA O ITULA FONO

Afioga Hon TUALA TEVAGA IOSEFO PONIFASIO: Lau Afioga i le Sui Fofoga Fetalai, e i ai le manatu ua sao i alo le tauteaga o le tatou Maota. Ua tali le sua a le Palemene ua maua foi se faasiligamalosi e faaaauau ai ia le tatou galuega i lenei aso.

Faafetai i lau Afioga, faapea foi i tapenaga uma sa feagai ma le tatou Ofisa o le Fono Faitulafono faafetai. E talu ai o malaga Faa-Palemene e pei ona tapena ai lau afioga mo atunuu mamao, i se aso o lenei vaiaso. E i ai le talitonuga e tatau ona lava se taimi mo tapenaga o feagai ai. A matau foi i le faagasologa o le tatou galuega, e le o toe tele se Vaega o totoe

Ou te tulai atu ma le faaaloalo lau Afioga e faatu le lafo, *Ina ia faataatiaese Tulafono Tumau 32 mo le suia o tatou itula Fono mo le Aso Fono lenei e faapea, O le a faaauau pea tatou Tualumaga seia aulia le itula e 1:00 i le aoauli nei, ona faataatiaese lea ma tatou toe tauaofia i le itula e 6:00 i le afiafi ma faaauau seia maea le faitauga faatolu o le Tulafono Tau Faaofi o le Faatatauina o Tupe Faaopopo (No.2) 2021/2022 ma le Tulafono Tau Faaofi o le Faatatauina o Tupe 2022/2023 ona tolopo ai lea. O le lafo lea ma le faaaloalo lau afioga.*

Faaluaia e le Minisita mo Faatoaga ma Faiga Faiva.

Na faamaonia le lafo.

FOFOGA FETALAI: Ia o le a faagasolo le tatou galuega e tusa o le lafo ua faamaonia. Ia tulai mai lau afioga i le Minisita o Leoleo.

Afioga Hon FAUALO HARRY JEFFREY SCHUSTER: Faafetai lau afioga i le Fofoga Fetalai mo le avanoa. Ia faafetai foi i lau afioga ma le mamalu o le Matagaluega mo le taumafataga. Ua maua foi le faasiligamalosi mai i le taumafataga.

Lau afioga i le Fofoga Fetalai e na o se faasaoga ua toe faamanatu mai e le sui usufono o Falealili. O le saoga o Falealili 2 lea na talosaga i se Tineimu. Ia e faamalulu atu ai i le sui usufono ia Maiava Tito, mai Falealili 2. O lea e i ai foi ia le latou talosaga mo se Fale Tineimu.

I le tulaga lea i faamaumauga a le Matagaluega a Leoleo, mai i le tausaga 2020, e 5 mo paipa e faaoga e ula ai le aisa na maua mai i latou osofaiga, i le 2021 e 2 na maua mai ai, ae o le 2022 e 7. Ae e matauina la e na o vaega ia na maua mai i osofaiga ia, e na o le 2 osofaiga na maua ai aisa. Ia ae o lea la e tele atu mo utensils ia na maua mai na i lo le aofaiga o aisa lau afioga i le Fofoga Fetalai.

O le isi tulaga sa fesiligia e le sui usufono mamalu o Safata 1, o le tulaga lea i nai afaigaluega a le Ofisa o Leoleo lea sa maliliu i le faalavelave foi sa asia e le sui usufono o Safata 2 le afioga ia Laumatia Purcell i le tulaga lea i Insurance. Ia e faamalie atu i sui usufono uma ia e toa 2, ia o le tulaga lea e pei ona tatou i ai nei o lea e i ai lava e pei o isi afaigaluega uma lava a le Malo. E a foi o le tulaga lava tau Insurance e taatia atu lava i le tagata faigaluega ia e totogi lana Insurance. E le o i ai se tulaga po o se fuafuaga a ia Matagaluega a Leoleo e faapea e totogi e le Matagaluega se Insurance mo le latou aifaigaluega.

Afioga Leaana Ronnie Posini: Lau afioga i le Fofoga Fetalai...

FOFOGA FETALAI: Malie lau afioga i le Minisita se i tuu atu le avanoa i Safata 1, lau afioga i le sui usufono mamalu.

Afioga Leaana Ronnie Posini: Faafetai tele i lau afioga i le Minisita, faafetai tele lava foi mo le faamalamalamaga o le mataupu lea. O le mataupu lea o le tulaga foi lea na maliliu ai ia nai alii leoleo ia e toa 3. E pei o lea na ou fesiligia leaga o lea foi ua ou faalogo soo lava i totonu o le Maota lenei, ia o le faigamalo foi ma le latou Faiga Faavae fou ua uma ona faataatia ai.

Ia aua o Faiga Faavae lava a lo tatou Malo i mea ia o galuega ia, e tauofo le galuega ona saili ai se konekarate e faia aua o lau vaai i le uta lea, o le matua tele lava o le uta. O lau la faitau, e ono fai e se konekarate ia le galuega, o lona uiga e omai lava le konekarate ma aumai uma ia uta ia. O mea e fai ai le galuega lea e pei ona e saunoa i ai. Ae e pei o lea ua foliga mai o lea ua omai lava nai tamalii ia e toa 2 lea na tau o kamuta lea na maliliu, e pei e foliga mai o laua lava e o e fai ia le galuega lea. O le fesili la lena e pei o Faiga Faavae lea na mafua ai ona maliliu o tamalii ia. E pei o le ala lea.

O le isi tulaga lau afioga, faafetai tele lava o lea ua e tolaulau ia mea ia o fualaau faasaina. Faafetai i tausaga ma mea o lo o agai i ai, ia o le a ou le taua le aisa leaga o lea ua saunoa ia le Fofoga Fetalai e aua e sa ona ou taua le aisa i totonu o le Maota lenei. Ae o le tulaga o le aisa o lau foi tuualalo, aua o lea e mautinoa uma mea nei, ae o le fesili foi lea o lea e mataitu uma e le tatou atunuu, ae o atu i le Faamasinoga, faapea mai le Faamasinoga e faaleaogaina ia moliaga ia, ona e le lava ia molimau a leoleo. Ae o mea o lea ua e saunoa i ai o mea ua tino ma ua mautinoa, ae o le uiga o lau tala, o lea e mataitu ia le tatou atunuu i mea ia leaga o mea faatupu mala le mea lea. O malaia ia i totonu o le tatou atunuu, ae o atu foi i le Faamasinoga faapea e le lava molimau a leoleo.

Ma le agaga faaaloalo.

FOFOGA FETALAI: Ia malo faafetai, leaga o lea ua taua ia le Fofoga Fetalai i le mea lea o aisa, ia e leai o le uiga o lau faamatalaga, ma e leaga o lea sa e saunoa e pei e masalomia le tatou Maota. O le mafuaaga lena na ou... o tatou ia e o i mau faamaumauina. Ia ae e taua tele foi le finagalo o le sui usufono latou mo le puipuiga o le agaiga i luma o le atunuu.

Afioga Laumatiamanu Ringo M. Purcell (Safata 2): Pe maua se avanoa lau afioga...

FOFOGA FETALAI: Ia mo le faasaoina o lou taimi, se i tulai mai ia le sui usufono o Safata 2.

Afioga Laumatiamanu Ringo M. Purcell: Ia faafetai mo le avanoa, ia o lea ua oo le saunoaga a le afioga i le Minisita i tulaga ia o Inisiua. Ia e pei o au lea sa laga atu ia le vaega lea. Ia e pei e faatatau tonu lava ia le talosaga sa ave i le Minisita, ia o i latou foi ia e maliliu i line of duty. Ia e tai pei la o latou ia sa maliliu ina ua lavea le taavale.

Afai e le gafatia e le Matagaluega ona totoi Insurance, ia e pei lava o lea na talanoa atu, a pe a ofa i ai ni 2 tausaga e fully pay ai ia le tagata lea? Ia aua o lea ua faafuasei ona maliu, ia ae o lo o i ai si ona toalua ma si ana fanau. E pei o le tulaga lea sa talanoa atu ai i lau afioga, afai e le consider ina Insurance, ia pe le silasila lau afioga i le Minisita, ae fully pay le tagata lea ua maliu mo si ana fanau ma si ona toalua ona o lea ua tuua le mafutaga. Ma le faaloalo.

FOFOGA FETALAI: Ia lau afioga i le Minisita.

Afioga Hon FAUALO HARRY JEFFREY SCHUSTER: Ia faafetai tele i lau afioga i le Fofoga Fetalai. Ou te talia ma le fialia le fautuaga i le afioga i le sui usufono mai Safata 1, o tatou uma lava o sui usufono e tatou te popole uma lava i le aisa. O lo o mataitu lava e le Matagaluega ia le tulaga lea i e o lo o faaogaina ia fualaau faasaina. Ma e o lau tilotilo i ai, o lo o lelei lava le faatinoina o tiute o leoleo i le tulaga lea, ona o le taimi uma lava lea e alu ai ia le latou osofaiga, e manaomia le search warrant foi lea e sue ai le fale o le tagata po o se nofoaga o la e masalomia, ia e saina mai ia le Faamasino. E le mafai ona o ae leai se... o lea la e foliga mai o la e sao lava le information lea e latou te maua. E maua mai foi la tagata ia, ia e i ai se fesoasoani o lea e faatalanoa le va i fafo ia le tulaga foi ia i taifau e fesoasoani i le Customs ma Leoleo, i le galuega lava lea e tasi ia ma le tatou scanner lea i le Customs, o le a fesoasoani tele lea i le popolega lea e i ai tatou te atugalua faatasi uma lava e le o se mea e tatou te popole uma ai ia aua ne i oo mai i Samoa ia lea faamai.

Ia si uso a sui usufono ia Laumatia, ia manaia tele le manatu, ana ou pule i tupe a le tatou Malo ua fai ananafi ia le mea lea e te finagalo i ai. Ia ae e tutusa uma aufaigaluega a le Malo, e pei o lau tau vaai atu a faapea a tau ia le maliu o le alii po o le tamatai leoleo, o tulaga masani lava a leoleo you pass in the line of duty. E moni e i ai le faaupuga lea, ae o isi foi aufaigaluega a le Malo, a galue ae maliu i le Ofisa, ia o le mea lava e tasi. Ia o le a totogi la leoleo line of duty ae pei o le a tatou faatuatuanai e tatau ona faatutusa.

A faapea e... ia se i o tatou vaai a alu lava i luga ia le tatou tamaoaiga i le tai \$1 miliona lea e tufa, ia atonu lava e faateleina ai ia le tatou lafoga e maua mai ia ona o tatou oo atu lea tulaga aua o se manatu lelei.

Lau afioga i le sui usufono i le tulaga lea i le aufaigaluega, leai o le Faiga Faavae lava a Leoleo mai i aso la e i ai lava ia le aukamuta lava ia a Leoleo e faia ia galuega laiti a Leoleo. E ese mai la i faletetele o Leoleo. Ma e i ai

foi le tulaga faapea e i ai i le Falepuipui e faaaoga e le Matagaluega ia pagota o lo o i ai tomiai faapitoa kamuta, palama i le tulaga lea o le faaleleia o Falepuipui ma mea o latou te faaaogaina. O le tulaga sa sau ai ia Leoleo, e i ai lava ia le aukamuta e faia mea o repairs ae le o faletetele. O faletetele ia o la e alu lava i Faiga Faavae masani e tatau ona fai tauofoga e fai ai. Ia o se faamalamalamaga lea lau afioga.

Lau afioga i le Fofoga Fetalai sa fesiligia e si ou uso a usufono mai Vaimauga 1 ia Sulamanaia Tauiliili le mafuaaga ua ala ai ona fai si tuai e le i tofia se Komesina o Leoleo. Ia e sao ua fai si umi, ae tatou onosai, sa maua foi le avanoa e talanoa ai ma le Matagaluega o le PSC i le taimi lea na tulai mai ai ia le tatou faigamalo fou lenei, e taunuu mai o le tele ia o avanoa. A tou tagai i ai toetiiti lava Ofisa Sili o Pulega o Matagaluega uma lava ma ACEO ua due konekarate. O lea mea la ua tupu o le taimi lea na fai ai konekarate a ua matauina foi ua aveese ia le tofiga o le CEO, faaitiitia foi le afaigaluega, ao latou la ua gafa ma le tulaga o le faasalalau o avanoa, fai interview ia e le o lava foi ia le afaigaluega ao lo o ua oo tonu lava i le taimi e... sue atu le Komesina o Leoleo e 3 isi Faauluuluga o Matagaluega ma isi ACEO o la e tau sue o la e i ai interview e faia.

O le tulaga la lea e taatia atu ai i le Matagaluega po o le a se fetuunaiga e latou te fetuunai ai i le lumanai, e faaitiitia le tulaga lea. Ae e leai se tulaga foi po o faigata se faaiuga ona o lo o sue foi ia nai isi CEO. O le...

Afioga Sulamanaia Fetaiai Tauiliili Tuivasa (Vaimauga 1): Lau afioga i le Fofoga Fetalai pe maua se avanoa...

FOFOGA FETALAI: Ia malie lau afioga i le Minisita leaga o lea sa lauga ai le sui usufono mamalu o Vaimauga 1.

Afioga Sulamanaia Fetaiai Tauiliili Tuivasa: Masalo o le itumalo lenei o Vaimauga o le aiga, e fesoasoani foi lava le isi sui usufono i le isi sui usufono. Ae o le Matagaluega lenei o Leoleo e sili ona ave i ai le faamuamua a lenei itumalo ona aemaise ia le Faauluuluga a le Matagaluega o Leoleo o gafa ma le vaaiga o le saogalemu o si o tatou atunuu. Ia ae o lea e matau ua leva ona.. i ai ia le tulaga o avanoa le faatumutumuga o le Matagaluega.

Ia ae faafetai lava i le Pulega a Alii ma Faipule, ona o le malu pea o Pulega a Alii ma Faipule aua o le a tulaga aemaise o le Matagaluega a Leoleo, ia o lo o i ai foi i lalo ma le Falepuipui. O le a lava le tala ae faalogo atu ua pa mai i tua ia pagota. E pei o le popolega na sa i ai le sui usufono ae faafetai o lea ua saunua manino... e popole tele le sui usufono lenei i le Matagaluega lea ona o le saogalemu o si o tatou atunuu o lo o i ai le faatuatuga. Ae o le agaga lena e avatu ai foi le tuualalo e le faigofie le tamalii foi o le atunuu o lo o talia le mea nei o Faauluuluga o Matagaluega.

Faafetai lava i nisi o Minisita e pei ona ou taua, e pei o le uso lea ia Olo e taunuu atu loa ia toe faatutumu uma ia avanoa, fai ana appointment i le AA, SPA. O lea foi ua maua le Pule o le MWTI. Ia ae o le popolega, e le gata ina delay ai ia le leai o ni Ofisa Sili o Pulega o Matagaluega, ae o tagata foi la e interview, e popole, aua e a? O la e faatalitali po o le a le taimi e sau ai ua le manuia, ia ona toe saili lea o nisi. Ae o lena ua ia outou le malosiaga. E pei o le agaga lena o lea e ta te tatalo atu ai ou te le iloa ae ona ua ia outou le malosiaga i le filifiliina ia ma e agavaa e... Ae o lou popolega na o le tuai, ia fai foi o lena, ia a o le popole o tagata ina ia mafai... aemaise foi o le aufaigaluega. E le mafai ona atoa na gaii le Matagaluega pe a leai se faatumutumuga. Ia e na o le agaga e tuuina atu i autafa, ina ia mafai ona faatino ia lena auunaga o lena ua ia te outou le malosiaga, ia aua le tapuaiga a si o tatou atunuu.

Manuia lau afioga i le Minisita.

FOFOGA FETALAI: Ia se i tulai mai lau afioga i le Minisita.

Afioga Hon FAUALO HARRY JEFFREY SCHUSTER: Ia faafetai tele i si ou uso a sui usufono o Vaimauga, leai e sao, e taua tele ia tatou alii ma tamaitai leoleo. Ia ae e le o se tupua taumate i ai tatou uma. O le Malu o si o tatou atunuu, ia e malu i Pulega a Alii ma Faipule, fesoasoani ai ia Leoleo.

Ia e sao le saunoaga foi lea e umi e le o i ai se Ofisa Sili o Pulega. E i ai foi le popolega, ae o lou matau i le taimi lena o lo o faasolo i le auvaega toa 3 Sinia ia o faasolo e vaavaaia ia le tofi, e matua lelei lava le faatinoina o tiute. Ae ana o au la, e tatau foi ona ou tilotilo pe o le a le mea e aumai ai ia le Komesina e toatasi ae o lea e auuai ia le toa 3 lea la e ok, ae e sao oe, e tatau lava ona i ai se Ofisa Sili mautu i le Tulafono ia ma le vaavaaiga foi o le Matagaluega. Ae o lo o faapena foi...

Susuga Hon Laauli Leuatea Polataivao Fosi: Lau afioga i le Fofoga Fetalai...

FOFOGA FETALAI: Ia malie lau afioga i le Minisita se i tulai mai lau afioga i le Minisita o Faatoaga.

Susuga Hon Laauli Leuatea Polataivao Fosi: Si mea laititi lava lea e na ona faamalamalama atili ia le saunoaga a le Minisita, le mea lea na saunoa i ai le sui usufono o Vaimauga. Sa feiloai le Kapeneta ma le faatumutumuga o le PSC i le vaiaso lena. Ae masalo o se taimi ona saunoa lea o le Sui Palemia e faaali ai le tulaga tonu lava lea e i ai le atugaluga i mea nei o le tuai o le faasologa o interviews a Ofisa Sili o Pulega o Matagaluega ma Faalapotopotoga.

E 7 i le 8 Ofisa Sili o Pulega o Matagaluega ia e poloka i i. Ia te au ia o le sui o le Kapeneta ou te le o iloa o i ai se mea faapea o tupu. Ae o se taimi saunoa laia o le afioga i le Sui Palemia i le mafuaaga o lea e toa ai ia mataupu a le PSC. Ma e sa faaalua manino e le Taitaifono o le PSC, e tele le isi vaega e fia fai ina ia tulai mai la le mea lea e i ai ia le atugaluga o le fiu e faatali avanoa.

Ae sao le sui usufono, a leai se Faauluuluga o le Matagaluega e le iloa pe faafelea ona faasolo galuega ae o le tasi lena toalia, o lea e feagai ma le tatou faigamalo i le taimi lenei. Ae o se taimi ona saunoa lea o le Sui Palemia o ia lea e tauavea ia le Matagaluega o le PSC i le taimi lea o tou silasila ai lea i le mea lea o le a toe faatulaga.

Ma lou faaaloalo.

FOFOGA FETALAI: Ia faaauau lau saunoaga lau afioga i le Minisita.

Afioga Hon FAUALO HARRY JEFFREY SCHUSTER: Faafetai tele i lau afioga, o le sui usufono o Safata 2 afioga ia Laumatiamanu Purcell sa ia laga le tulaga i moli o taavale lea ua fesuisui ai solo ua le ogatasi ma le tulaga o la e faamaumauina e faaoga uma lava e le lalolagi. E tutusa uma lava ia Leoleo o le lalolagi o le mumu ma le lanumoana.

Lau afioga i le sui usufono, o le tulaga lea sa laga foi e le afioga i le Minisita ia Olo ia le faaogaina lea. O la la ua galulue ia le Matagaluega ia toe faasao ia le faaogaina o moli. Ia aua le feseai ma le gatusa ai foi ma le tulaga e le masani ai.

O le isi tulaga sa laga e le sui usufono o le tatou fua ona o le tulaga ua faatau i faleoloa o Saina ia o tatou fua. O le Tulafono e pau le Tulafono la e i ai i le taimi nei o le Tulafono lava mai i le 1961 i le tatou fua. E i ai le fua o le tatou Malo ia o le ata o le tino o le fua ma tulaga ia o le faamalositia a sisi ia le tatou fua ma ta ia le vii o le Fua e tataua ona o tatou tutu uma. E sa foi ona minoi ia ni taavale i nofoaga faitele o faatino ai ia le tulaga lea ae le o i ai la se tapu o faataatia mai i le Tulafono lea po o ai e mafai ona faatauina ia le fua a Samoa.

Ou te iloa la e o fua lava la e faaoga e le tatou Malo e faatau mai i le Treasury. Ia ae o lea ua o tatou vaai i le tulaga lea ua faatau i le tele o faleoloa, ia ou te iloa lau afioga i le sui usufono e mafua mai le tulaga lea o taaloga foi ia a le World Cup Lakapi ma le Liki lea e ta te vaai i Niu Sila, fua a Samoa, Toga ua faatau. Ia ao Kamupani ia ua maua ai tupe i le tulaga lea. Ia e pei lava ona ou fai atu, e leai se tapu i le tatou Tulafono.

O le isi fesili lau afioga i le Fofoga Fetalai, o le fesili i le afioga i le Sui Taitai o le Itu Agai o le afioga ia Lauofo Fonotoe. O lana fesili i le tatou Police Academy, po o le a le tulaga ua i ai? Ia ma le faaaloalo tele lau afioga e taua ia le fesili. O lo o ... e faaauau le polokalame, e na o le pau le tulaga lea e i ai le toa o le... e latalata i le 100 ia le aufaigaluega a le Malo o Saina.

E omai mai Saina e fau ia le Police Academy i Tafaigata, ae o le toa lena e i ai e fia maua se kamupani se auala e mai ai i Saina e omai ai i Samoa ona o le taimi foi o le Koviti lea na faasa ai e Niu Sila na ui mai ai ni vaalele mai i Saina i totonu o Niu Sila. Ia ae o lea la ua amata ona talatala, ou te iloa la ua toeitiiti ona toe faatalanoa e le Matagaluega ma le Malo o Saina pe a maua ni auala e malaga mai ai le aufaigaluega a le Malo o Saina, o le aukamuta lea e omai e faatino le galuega lea i le Police Academy.

Ia lau afioga i le Fofoga Fetalai te i ua misi ia te au ia se finagalo o se isi o sui usufono ae pei o le...

Afioga Hon Laufo Fonotoe Nuafesili Pierre Laufo: Lau afioga i le Fofoga Fetalai...

FOFOGA FETALAI: Ia tulai mai lau afioga i le Taitai o le Itu Agai

Afioga Hon Laufo Fonotoe Nuafesili Pierre Laufo: Ia ma o le a faaiuiu le saunoaga a le afioga i le Minisita, faafesili atu faamolemole i le tatou Police Academy, po o le tulaga lea pe na o le fausiaina lava o le nofoaga, ia pe aofia ai ma koleniga ma tulaga o le puipuiga ma mea faapena? O le faafesili lea faamolemole.

FOFOGA FETALAI: Ia tulai mai lau afioga i le Minisita.

Afioga Hon FAUALO HARRY JEFFREY SCHUSTER: Faafetai i lau afioga i le Sui Taitai. E pau lava le vaega la e lavea i le vaega lea i le ofo lea a Saina e na o le fauina o le fale. Ao le tulaga i aoga ma le koleniga o le aufaigaluega, e pau mai la ia tatou. O le taimi nei o la e faatalatalanoa... o lo o i ai lava le vaega a le Matagaluega o lo o faia ia koleniga ma aoaoga ae o lea foi e faatalanoa ma le Malo o Ausetalia. E faapea foi Niu Sila i se fesoasoani i le tulaga o Koleniga, ae e le o aafia ai se tulaga faapea e aumai ia ni faiaoga mai i Saina e aoaoina ia tatou leoleo. Ia o le tali lea i lau afioga i le sui usufono.

Ia lau afioga ia e na o nai fesili na laga e sui usufono, faamalie atu pe afai ua pau ia se fesili a se sui usufono ia te au. Ae o lenai taimi lau afioga e fia momoli le agaga faafetai tele i lau afioga mo le avanoa. E fia faailoa foi le faafetai tele i le Tamaitai Minisita mo le Tala o le Tupe ma le vaega ua atofaina i le Matagaluega a Leoleo ma le Tineimu faapea foi le Ofisa o Komesina o Faigapalota.

Faafetai i aufaigaluega uma a le Malo e mo le faataatiaga o le Tala o le Tupe. Ia e moi lava ua leva ona sui usufono, ia ae i ai lava le mea ou te ata ai pe a o ta tilotilo i le tatou Tala o le Tupe. E pei o le mea foi lea aua e silafia foi e le la itu o le malu ua leva ona i ai i i. E fai loa le Tala o le Tupe o tatou

omai loa tatou talanoa i i ao le talanoaga o le Tala o le Tupe e leai lava ma se isi e talanoa e na o le Minisita lava o Tupe e talanoa ma lana Matagaluega. Ia o lau faatusa la o le Matagaluega o Leoleo ma le Tineimu ma le Komesina. A matou talanoa la e talanoa i le Tala o le Tupe ae a ou fesili atu la i ai ua tou fiafia pe ua tou le fiafia ae tali mai, ua le fiafia ua tipi ia le matou Tala o le Tupe. Ia o lau tali, ia e faigata ona faaali mai ia te au ia le tou tali ona o outou lava na tou o ma talanoa ma le Treasury. E le i i ai au i le tou talanoaga, ae ui i lea lau afioga, faafetai tele lava mo le vaegatupe mo le Matagaluega lenei.

Lau afioga i le Fofoga Fetalai e fia... ne i te i ua pau ia te au le le fiafia o si ou uso a sui usufono lea mai Aleipata Itupa i Lalo ia Faleomavaega, ia o maua na o i le Manu Samoa ae la e fai mai aua ne i galo faatonu mai au aua ne i galo ona faafetai i le Toa Samoa. Ia lau afioga ia mo tatou uma lava i le Maota, ia faafetai tele lava i le Pulega a le Liki, ia matagofie le taaloga i le weekend lea na tea nei lea na malo, lami ai le tatou au i le Malo o Rarotoga. Ia malie sa matou laulau uma sui usufono uma lava o Vaimauga, 1 2, 3, 4 ia ma le lauga ia Tuisamau ia Maulolo.

Ae ula le alii lea o Falemavaega fai mai sole, o le a le mea o le a ou fiafia ai o Rarotoga lea... e matou te faamanatu, Faleomavaega, na vali foi tatou e Rarotoga i le isi tausaga i le liki. O lea ua toe faasao i le mea lea, ae faafetai tele atu i le Pulega o le Liki.

Ia momoli foi le faafetai lau afioga i si o matou itumalo i Vaimauga 4. Le Paia ia Alosina, Fuaifale o Salevalasi, Faletolu ma le Vainalelepa, ia ma Upu ia Tuisamau. Faafetai tele atu lava i le tatou Itumalo ma le tatou nuu i Apia. Ia ma pitionuu uma e 25. Faafetai mo le tapuaiga ma le lagolago. Ia ma le tatalo mai foi i le taumafai e faatino le galuega. Talosia o faamalieina outou i le taumafai.

O lea e tatou te galulue i le \$1 miliona, ia o matou o nuu mavae e tasi le nuu mavae o Apia ma Alamagoto o le nuu lava e tasi. Ia ma matou pitionuu e 25, ae e \$1 miliona lea e tufaasoa, ia ua ou fia maua lava ia le ituaiga malosiaga lea na maua e Iesu e tufa ai ia ma le falaoa e tufa atu, tufa atu tufa, ia se i taumafai atu i ai le tatou itumalo uma lava, ia aua tatou te popole. O lena e i outou aao ia le malamalama ma le tofa foi i le faasoaga o le tatou tupe pe a maua atu, ia uma ifo ia lenei Paeaiga, ua faatofulia uma ia le tatou nuu i Apia ia ma tatou pitionuu uma e 25, ia le naunautaiga a le Malo ia taumafai e atinae ia tatou e le o tagolima ma e le o tele foi, ia o lea ua maua ia le avanoa e atinae ai.

Lau afioga e fia momoli le faafetai i le afaigaluega uma a le Malo, ia faapena foi ona fia momoli lau faafetai faapitoa i le Matagaluega Leoleo, Falepuipui ma le Toefuataina, faapea le Komesina o Faigapalota.

Ia lau afioga i le Fofoga Fetalai ma le mamalu o le Fono, ia o Leoleo, e le o i ai se Komesina. Ua fai si umi e le o i ai se Komesina. E faapena foi ia le Matagaluega a Le Komesina o Faigapalota. O la e foi e auai ia le

aufaigaluega ae o la e tau sue ia se Pule Sili but e momoli atu lau faafetai ma lau faamalo ia outou uma na. E le faigofie le tou galuega, ae o la ou te matauina o la e faatino i le mea e gata ai. Malo le galulue malo le tautua. E faapea foi i le Matagaluega a le Tineimu ma le Uluai Fesoasoani.

Lau afioga i le Fofoga Fetalai, faafetai tele lava mo lou avanoa ia le mamalu o le Fono a i ai se tala po o se aga ua le tautamalii ia e faamalulu atu. O le isi foi taimi e tau ova le naunau ae masae ai ia le laufai. Ia ae manuia tele ia le tatou Fono.

FOFOGA FETALAI: Ia ua faamalo saunoa i lau afioga i le Minisita, fitoitonu i le Matagaluega o Leoleo faapea Falepuipui ma le Toefuataina, ia aemaise foi ia le Ofisa o Faigapalota ia me le Tineimu ma le Fesoasoani Muamua. Ia malo lava, faafetai foi le galulue i le tou Matagaluega, o lea foi ua talifuaitau i finagalo sa laga i le Maota, ia o le faanaunautaiga lava o le saogalemua ma le agai i luma o le tatou atunuu.

O le mea lea faamalo faafetai i lau afioga ma au Matagaluega galulue ia aemaise foi o le Tala Faatatau o le Tupe, pau lava o si faasoa ua oo atu i le tou Matagaluega, tatou maua le lototele ma onosai. Tatou faamoemoe i le Alii e fesoasoani mai. O le mea lea malo faafetai saunoa i lau afioga i le Minisita.

Ia ua oo mai i le afioga i le Minisita o le Soifua Maloloina o le tatou atunuu Honourable Valasi, ia o lou avanoa leni.

Afioga Hon VALASI LUAPITOFANUA TOOGAMAGA TAFITO SELESELE (Minisita mo le Soifua Maloloina): Malo faafetai i lau afioga i le Fofoga Fetalai, e talitonu foi o leni vaitau o le aso e vaavaai atu toetoe lava a afa le aso. E i ai le talitonuga faamalo faafetai. Ua matauina mai i le amataga o leni Fonotaga seia oo mai i leni ituaso le matagofie o le faasoa a le Atua i lo outou soifua ma so matou ola ua maua ai le filemu aemaise lava tualumaga o le fonotaga mamalu. Ma e moni lava, po o le a lava le luga lalo, fetuleiaiga o manatu ma lagona ma finagalo, ae e matua lava ia manuia Samoa.

Lau Afioga i le Fofoga Fetalai a o le i faia se tala a le Minisita o le Soifua Maloloina, ou te muamua ona ou tepa atu i lou uso a sui usufono, le o lo o tusi o ia o le Minisita Lagolago i le Soifua Maloloina, lau Afioga Tea Tooala Peato, ia tapuai maia ma le manuia. E le mafai ona sii le ta sa i tai ae le i i ai sau faamanuiaga. Ne i meaane ua ou le tepa atu ona e faapea lea ua ou le manatu atu. E le gata i lea o le Matagaluega e pele i le agaga, le Matagaluega o le Soifua Maloloina, i ona tupu ma ona tamalii, e amata mai lava i Faauluuluga seia oo lava i se aupito iti o le Matagaluega. A oulua susuga i ACEO o lo o tauaveina le Matagaluega i le aso po o le vaitau leni, lau Susuga Tagaloa Robert Thomson, le alii fomai, aemaise foi le Susuga ia Glenn Fatupaito Atoa, ia tapuai maia, aemaise foi o le Pulega atoa. Ua

matauina foi ua tatou faatasi ma le tamaitai loia o le tatou Matagaluega o vae ma lima o le Matagaluega i ana fautuaga ma le tuualalo i Tulafono, aemaise le faaauauina o le tatou galuega le Susuga ia Delphina Kerslake. Ia malo o lo o matauina o faatasi mai.

E 2 isi vaega tetele lau Afioga i le Fofoga Fetalai o lo o i lalo o le portfolio lenei, ae talu lava ona amata mai saunoaga a sui usufono mamalu, e le i afea lava ia vaega tetele. E ui lava ina le afea, ae o lo o manatua pea, ma e le mafai, le mafai ona aveesea e le lauga a le Matagaluega. Susuga Mulipola Rodger Hazelman o lo o faafoeina lea vaega tele o le Kidney Foundation po o le National Kidney Foundation po o latou foi nei ua gasegase i le faaletonu o fatugao se i tulou. E to le pulou, ia tapuai maia Mulipola aemaise le Komiti Faafoe, le Afioga i le Taitaifono ma le Komiti o lo o faafoeina lea vaega taua. E le gata foi i lea o lo o i lalo o le Matagaluega po o le portfolio lenei le Iunivesite e taua o le OUM po o le Oceania University of Medicine o lo o faafoeina e le Susuga ia Toleafoa Manuafalealili Dr. Viali Lameiko, aemaise le Pulega ia ma le Komiti Faafoe. Tapuai maia ma le manuia.

E le gata foi i lea e le faagaloina i le lauga a le Matagaluega Faauluuluga ua taua o Councils eseese. O Council nei e faauluulu i ai vaega tetele o le Soifua Maloloina, o latou e taula i ai aua le fautuaina o lea vaega ma lea vaega, e pei ona manuia ai le gasologa o le galuega, i Taitaifono eseese, i le Samoa Medical Council, Nursing Council po o le Council lea a Tamaitai ma Alii Tausisoifua ma le Au Faatosaga. E le gata foi i lea o le Pharmacy Council po o le Dental Council aemaise foi o le Council, po o latou nei o itutino e tuufaatasi o latou finagalo ina ia faufauina ma fautuaina nisi o vaega a le Matagaluega.

Ia, a outou Afioga i Taitaifono ma le mamalu o Komiti o Council eseese, ia, e le galo la outou galuega. E le gata foi i lea e manatua i le loto association eseese o lo o faatinoina o lo o tautuaina, vae ma lima i le Matagaluega, e pei o le Samoa Nursing Midwifery Council, Samoa Medical Doctors Association, aemaise le Faalapotopotoga o Fomai Tutoatasi po o Samoa Independent Doctors po o General Practitioners. O lo o galulue soosootauau ma fesoasoani malosi i le Matagaluega i ona vaega o lo o manaomia ai le fesoasoani.

Lau Afioga i le Fofoga Fetalai ma le mamalu o le Maota, e le faagaloina tapuaiga ma le faafogafoga mai a falemai i nuu i tua o lo o tauaveina tiute o itumalo, e le gata i lea o le Pulega i Salafai, lau Susuga Pili Alatimu, ua e faafogafoga mai. Malo le galulue. E le gata i lea o Faauluuluga o Falemai eseese i Salafai, aemaise Upolu nei, ia o outou faafogafoga maii le lauga a le Matagaluega, o lo o oo atu lava ma asiasi atu i tulaga taualoa aemaise a outou tapuaiga. Aua o le tatou galuega e faufaatasi, e le o se galuega patino i lo outou mamalu, o le galuega patino ia tatou uma.

Lau Afioga i le Fofoga Fetalai ma le mamalu o le Maota, afai o i ai se isi e le o maua e lau oo atu ae le i amatalia se upu a le Matagaluega, ia o le tatalo

lava i le Atua, o ai se lilo, e le mafai ona lilo i le silafaga a le Atua, ia oo atu i ai faamanuiaga, pai atu le mana faaola aemaise foi o faamanuiaga a le Atua ia te outou uma. E leai se tasi e leai sona sao po o sana maa o togi i le taumafaiga o le tatou Matagaluega.

Lau Afioga i le Fofoga Fetalai ma le mamalu o le Maota, o le Matagaluega ou te faaigoaina o se Matagaluega amusia, o se Matagaluega e tele i ai tala a le atunuu, a o se Matagaluega foi e tele i ai lafoga. E i ai le talitonuga, talofa, ina ua tulai mai e tauave le Matagaluega, sa ou faamatala i le Matagaluega ma fomai, o Valasi e le o se fomai, o le matai Samoa tausiaiga, tausinnu, tausii Ekalesia, ae faamoemoe i le Atua, a faaogaina le tagata faatauavaa, e i ai le talitonuga, e faamanuia le Atua i mea uma. E le toe tau faamatalaina lau Afioga i le Fofoga Fetalai ma le mamalu o lenei Maota le ogaoga ma tiga ma faigata na oo i ai Samoa, o lo o savalia pea e oo mai i le aso, i faamai matautia, i le Koviti-19, e le gata i lea, e le i leva tele atu le misela ma nisi faamai matautia. Paga lea, talofa i le Matagaluega. Amuia outou o outou o tagata o alo o Samoa, amuia, ua outou finau ma tautua i taimi faigata ma taimi e moomia ai e Samoa le laveai.

Lau Afioga i le Fofoga Fetalai, e tele tagata e pei e faatauemu i puipuiga o le faamai o le Koviti-19. A e silasila lau Afioga i le Fofoga Fetalai, tiga se faiga e maopoopo ma lelei a le Matagaluega, e i ai lava e o lo o faitio. Silasila i lenei vaiata. O le timata ma le timai a le Matagaluega, ia puipui pea le soifua ma le ola e ala i a outou talifofoga, e ala i le faia o le va, aemaise o le tauaveina o tui puipui po o card foi nei e tauaveina aemaise ia tausii tulaga aloaia. Ae silasila lau Afioga i le Fofoga Fetalai, e tele mea ta te asiasi i ai, e leai ma nisi, e itiiti lava se vaega o tauaveina ia tulaga.

Lau Afioga i le Fofoga Fetalai ma le mamalu o le Maota, e ala ona umi sau tala i pito ia, e taua ma e ou te faatauaina le tiute o le Matagaluega o le Soifua Maloloina, e tatalogo pea Masefau i le tulaga puipuia o le soifua ma le ola. O lea ou te ofo alofa atu ma ou faafetai i le au galulue i le po ma le ao, ao ma le po i le tauaveina o ia tiute, aemaise lava le puipuiga o le tatou atunuu. Malo faafetai. O le tatalo a la outou Minisita, ia matala le lagi, ia to manu aua tiute ma faiva a Susuga i alii ma tamaitai fomai, Alii ma Tamaitai tausisoifua, aemaise so o se tagata Samoa o lo o taumafai ina ia puipui aemaise tulaga e pei ona i ai. I lau vaai, e tou te le o galulue faatumutumulima, e tiga ona le atoa le pay, tiga ona faatauavaa le totogi, tiga ona leai le tau i lea mea ma lea mea, ae o le tou vaai ma la outou silasila i le tautuaina o Samoa, e faatauaina. O lea e momoli le agaga faafetai. A umi sau faafetai i le Matagaluega, sala umi, leaga e le faigofie i lou manatu ma le lagona le galuega tele o lo o faia pea, e le gata i le falemai tutotonu, falemai i nuu i tua, aemaise le malae vaalele i le autovaa mai o tagata Samoa, ua matauina pea le galuega fita.

Lau Afioga i le Fofoga Fetalai, e alu lenei aso o ou faafetai i le Matagaluega, ae o lou fiafia ia ou te faafetai ona o lau vaai i le galuega o lo

o i ai. Ou te manatua i lou loto se tasi o CEO ua faamavae, i lenei itula o le aso afai o faafofoga mai le Susuga ia Leausa Dr. Take Naseri, e le galo oe i le mafaufau o Valasi. Ae ou te talitonu ona o tulaga ua maea konekarate aemaise foi le toe iloilo ina o se isi tulaga e pei ona i ai i lenei vaitau, ae sa maea lelei foi lana taumafai. Faafetai Leausa, faafetai tele i lou tiute ma le faiva ma le galuega sa fai. E silafia e le Atua. Afai foi o i ai ni faaletonu o le Matagaluega ma le Minisita faatoa 7 i le 8 masina o oulua mafuta, ia, e silafia e le Atua mea uma. Ae i ai le talitonuga, ia, e ese le manaia o le mea lena ua ou vaavaai ua e amataina, faafetai i lau pisinisi aemaise foi le galuega ua faatino i ai ou tiute ma ou faiva. O le faamanuiaga, ia manuia ou faiva. Ia manuia lou agai atu i na tiute ma faiva, aemaise o le gasolo atu o le tatou atunuu. Ia, o le a e tali foi ona ua e manatu i le soifua auauna.

Lau Afioga i le Fofoga Fetalai, afai e i ai se tasi o le Matagaluega e le i oo i ai le faafetai, e pei lava ona ou fai atu, o le Atua o le lagi e silasila i mea lilo ma ia oo atu ana faamanuiaga i so o se tasi aemaise lava o Ofisa Sili o Pulega, o Itutino, aemaise lava... Semeamanu lava e galo ia te au lau Afioga i le Fofoga Fetalai, o itutino esese o lo o lagolago i le faafoeina o galuega a le Matagaluega o lo o fai ma uo ma paaga a le soifua maloloina, o lea lava e tauaveina. Ma o lo o outou silasila nei i le paketi o lo o ua faavasegaina mo le uluai taimi ni vaegatupe e tuuina atu e lagolago ai lo outou mamalu, e pei ona i ai le Cancer Society, o le METI. Aua ou te iloa o le tele o tatou i inei o lo o aoga i ai le METI, e le gata i le moe taagulu, e i ai masini e faafilemu ai, a o taumafa ua tele lava le fualaau ma mea faapena. O lau tatalo foi afai o faafofoga mai le Susuga i le Fomai, vaai ni masini lelei e aoga mo le Palemene. Aua ou te talitonu o lea lava e lauga ae taagulu lava le isi.

Lau Afioga i le Fofoga Fetalai ma le mamalu o le Maota, e le gata foi i lea, o le Family Health, o le GOSHEN po o le Kosena i Moamoa. Sa ou asiasi i ai. Lau Afioga i le Fofoga Fetalai, e taua tele ia te au tagata nei, aua o le mea moni e leai se aoga e atiae ai ni faletetele ae o lo o suffer le tele o tagata e pei e amuamu i ai nisi tagata Samoa. Talu ai nei lava sa ou asiasi i ai po o le vaiaso na tea nei, sa ou vaai o lo o manaomia, e i ai manaoga o lo o manaomia. O le ala lea o le tele o itutino pei o le isi itutino o lo o fou nei o AGAPE Clinic, ia, o nisi foi o tausisoifua o lo o faafoea ia fuafuaga, sa faapena ona faasafua i ai tulaga uma o gaoioiga ma puipuiga o le Koviti-19. E leai lava se faalapotopotoga e le i i ai so latou sao taua i le tapenaina ma le fesoasoani ia Samoa. O le mea o lo o taumafai lau Afioga i le Fofoga Fetalai, na ala ona ou taua ia faalapotopotoga uma, e i ai nisi faalapotopotoga e le i oo i ai se tala, ona o le naunautaiga ia galulue faatasi uma Samoa. Ia galulue itutino uma, aua ne i i ai se taofiofi o faamanuiaga mai le Matagaluega agai i tatou vaega nei, ina ia faigofie le avatuina o le galuega i tua aemaise tulaga uma.

Lau Afioga i le Fofoga Fetalai, ona ou oo mai lea i mea sa laga e sui usufono. E 30+ alii ma tamaitai sui usufono sa saunoa, ae na o le toa-5 lava

i le toa-6 sa afea le Matagaluega, o lo o faamaumau lelei i lau api. O i ua ou iloa ai lau Afioga i le Fofoga Fetalai, ua malilie uma itumalo i le tiute ma le faiva o le Matagaluega o le Soifua Maloloina, ua le toe lagalaga ni manatu. E ui ina tatou feagai ma faamai, a o le ata lea, ua malilie alii ma tamaitai sui usufono o le Maota, ua le afea ai le Matagaluega ona o le taua o le galuega. O le ala lea o le faafetai atu, malo faafetai. Aua o tiute, o paia ma mamalu o itumalo e fia o Samoa, o lea ua titi tonoa ma o lo o i aao o lau Afioga i le Fofoga Fetalai. O ai la se isi mamalu i tua atu? O le ala lea o lou faafetai atu i Afioga i alii ma tamaitai sui usufono. Faafetai i le Sui Taitai o lena Itu. O au o lou fiafia ia ae feteenai manatu, ou te fiafia ae avatu aumai, aua o le mea moni, o le mea lena e iloa ai le Itu Agai malosi. Leaga sa ou saofai, leaga e 10 tausaga o ou saofai mai i ina i le agaia o le Malo. O i ina foi na ou iloa ai lota miti ia ta fia faimalo. O lea ua alu alu la le miti, ia lea ua ta lauga atu i inei, ae ua outou talanoa mai.

Lau Afioga i le Fofoga Fetalai ma le mamalu o le Maota, leaga le mea ina manaia o le tu malo, ae le faapea la ua Minisita ona soona sasa ai lea o le Itu Agai, leai. Leaga e taua la outou tuualalo, e taua lo outou sao e matimati ai Matagaluega. E leai lava se isi o matou na masani i se tofi Minisita, e fou ae e ese le taua o le taulagalaga ma tulaga e pei ona i ai.

E i ai toeiina sa matou faipule i aso ia, sa ou maua mai toeiina matutua e i ai Fuimaono Mimio, Tupua Tamasese, Leilua Manuao, Le Mamea Ropati. Ou te laitiiti lava i aso na, ou te aulelei ai foi i le taimi lena o ou mitimiti. O le uiga o lau faamatalaga, leaga toeiina, o toeiina o le tofa ma le faautaga, ae aua ne i e sese, e taga lava maa a le toeiina, e tauai mai lava ma pa tonu lava maa a toeiina. E faapena la toeiina lea e i ai Tapunuu ma Lautafi ma... o lea lava e taga latou maa ma... o isi la taimi ua au mai i inei, a o isi taimi ua le au. O le uiga o lau tala, faamalie le tatou mafutaga.

Lau Afioga i le Fofoga Fetalai, o lea ua ou matauina le taua o le le toe lagalaga o ni finagalo o itumalo e fia i le Matagaluega o le Soifua Maloloina. Ona ou amata lea ia Siumu, lau uo o Tuuu, sa ia lagaina le tulaga e pei ona i ai le faamautuina, ma sa toe fesiligia e lana Afioga, se i toe faamanino lava le vaega foi lea o le Koviti-19 ua i ai, le aofai o latou, aemaise foi i latou i mea o tui puipui. O lau tali i le Afioga i le sui usufono, o le taimi lava na e lauga mai ai, sa ou fesootai i au ACEO ma aumai ai se ata lata mai. O le 18 tausaga agai i luga, ua 99% o le first dose, 93.5% o le second dose. O le target sa target i ai le population a tatou i le tui lea, e 121,891. O le first dose lea e 99% ua 122,193. O le second dose e 114,006 lea e i ai le 93.5%. O le 12 i le 17 tausaga, e 99% le aofaiga o le 28,374, ae 92% i le 25,710. O tagata ia po o alo ma fanau e 12 i le 17 tausaga. O le 5-11 tausaga ua 98.8% a o le second dose, e 90.6%. O le second dose e 36,819, o le first dose o alo ma fanau e 40,141, a o le target na fua mo le 5-11 fanau, e 40,638. A outou faafofoga la pei ona faafesiligia e le sui usufono o Siumu, o le tele o tatou tagata ua tui. O le ala lea e faafetai ai i le galuega a le aufaigaluega. E oo mai

lava i le aso, o lo o gasolo atu lava e faigata ma latou foi ia e fiu e taulogologo, ae maua lava i le mea foi lea, faatoa oto lava le pulou pe a to timuga. O lea foi e tauvalaau lava le Matagaluega, o lo o faaauau pea, o lo o faaauau pea tulaga o i ai a tatou tui.

O boosters, e 76,591 tagata ua kava i tui ia e tau o boosters po o tui faatolu. O le second booster, e 40 tagata. O lona uiga o lo o i ai le avanoa mo i latou, o lo o faafofoga mai foi o lo o talanoa atu le tatou atunuu. E le o se matafaioi a le Soifua Maloloina le tauanau o oe. Ae i ai le talitonuga, ia tatou galulue faatasi ma ia tatou vaavaai i le manuia. Leaga le mea ina a manaia lau Afioga i le Fofoga Fetalai, o le Koviti-19 ua sau, ana oo mai le Koviti-19 lau Afioga i le Fofoga Fetalai e le i sopo le tele o tui puipui, tatou te le fia oo i le mea sa tupu i isi atunuu, e fola le mea o le tagata maliu, se i tulou. Ae faafetai i le Atua ma Samoa ua oo mai, ia na ona toe autalu lava le uiga o le faaupuga. Na ona toe vaai i nisi o tagata Samoa, o lea lava e faafitauli. E i ai isi tagata o le talitonuga faalelotu e mafua ai ona le tui. E fiu lava tatou e alaga atu, ia a o le talitonuga lena. Ia ma le isi lava amio, ia o le le kea lava i tu ma aga e pei ona fai atu ai le Matagaluega. O le aofai ua aumai ia te au o tagata ua faamauina soifua maumau po ua maliliu e oo mai i le aso, e 29 tagata. Ia o faamaumauga foi e aumai a le soifua maloloina ma i latou o fomai, o le tele o ia tagata, e le i i ai ni tui na faia, aemaise foi o nisi o latou e toatele o lo o i ai gasegase tumau e faigata ona....Ae peitai ua oso tonu ma taimi o... Ia atonu foi tatou te talitonu i le agalelei ma le alofa o le Atua. E le o se numera laitiiti lea numera.

Lau Afioga i le Fofoga Fetalai, avea lena avanoa taua, afai o faafogafoga mai aiga, matua, o uso ma tuafafine, o uo ma e masani ma alo o Samoa, ia faamaise le Atua e ala atu i le Miinsita o le Soifua Maloloina i lo outou mafatiaga, ma le loto mafatia ma le loto faavauvau ona o i latou ua pele ma mamae ua amia e le Atua e ala lava i faamai. Matou te talitonu e le atoa i'a i liu o sa o le aufaigaluega, aemaise le Matagaluega, e i ai lava sasi, ae le mafia, le mafai ona silafia e le Matagaluega ma se atamai i lalo nei, le finagalo o le Atua. Matou te le tuuaia le faamai, ae matou te talitonu ia alofa le Atua, le Atua faafofoga tatalo e ma le Atua o manuia, ia faamaise Lona agaga i aiga uma, uo ma e masani aemaise o fanau, o matua na aafia o latou aiga i le Koviti-19 seia tau mai i lena vaiata.

Lau Afioga i le Fofoga Fetalai ma le mamalu o le Maota, o le ala foi lea o le faamalulu atu i le Maota nei i tulaga e pei ona i ai ia fatia, aemaise lava le le mafai ona tatou faafoeina le tulaga e pei ona aliali mai i mea o faamai eseese ua aafia ai Samoa, ae talitonu lava i le finagalo malamalama o tatou tagata, aemaise foi tulaga e pei ona tulai mai talitonuga aemaise faamai e pei ona i ai.

O le isi vaega o le fesili a le sui usufono mamalu o Siumu, po o faapei tagata mai fafo o lo o gasolo mai. Lau Afioga i le Fofoga Fetalai o le mea lea ia manino, o lea foi masalo e i ai se taimi toe faasalalau le suiga o lo o ua

i ai nei vavao, aua e 4 vaiaso lea sa... E i ai se taimi saunoa i ai le Sui Palemia. Ae o tulaga lava o tagata autovaa mai, ia ua tatala lava le avanoa, ua le o toe i ai se saisaitia i tulaga e pei ona i ai le oo mai i le malae vaalele ma suesue e latou ma taunuu i o tatou tagata. Ia afai lava e negative, ia ua alu lava. E oo foi i le positive, o lo o i ai foi fautuaga, e alu lava e nofo i lona fale ma filemu, aemaise lava ia taumafai e tausii lava e ia ia aemaise le aiga.

Ae matau lau Afioga i le Fofoga Fetalai, tasi lea mea sa talanoa tele i ai matou ma le Matagaluega. Aua o le tele o tupe alu a le Matagaluega ma le tatou Malo, e taumafai ina ia puipui tagata nei ma taumafai e... A o le mea moni lau Afioga, sole, e le usitai lava tagata. Ona i ai lea o le talitonuga, tuu ia le tagata e alu e saoloto i lona aiga, o ia foi ua fai lona mafaufau, se i tulou, ia, e puipui ai ia nai lo le taumafai o le Matagaluega i nei tupe e tele ma latou taimi faaalu e fai follow ups. O lo o fai lava matou galuega faapena, ae ua tuu i ai le avanoa, afai e uma le 5 aso, o le mea fou lena ua i ai, sa faapea e 3 aso, a uma loa le 5 aso, ona toe alu lea e toe test, alu lava ia i se falemai e lata ane e fai ai lana test. A fai foi e i ai nisi vaega o lagona e ia ua afaina, o lona tiute lena, e alu e vaai le fomai ma vaai se tasi.

Sa i ai le fesili a si ou uso ia Tapunuu, le sui usufono matua o le Maota, ina ua silasila mai ua alaala atu le Susuga nei ia Leatinuu. Na uma loa ona ta talanoa ou tulia loa le Mnisita e alu e puipui i lona fale, a. Aua o le mea moni lava lau Afioga, e le i aafia, na sau ma lana test faaali mai ia au o la e negative. Ou fai atu, malie lou finagalo lau Afioga i le Minisita, e tataua ona e susu e tapuai i le fale ma e tatalo. O lea la ua vili mai, e sao lava oe Valasi, o lea ua ou manuia lava, e leai lava se mea o afaina. O le ala lea Tapunuu mo le taimi nei ma le gasologa, ua leva ona faasau ai le tatou... a susu mai pe afio mai le tagata i le tatou malaevaalele, pe maua e positive, e alu lava ia i le fale e isolate ai pe puipui ai ia. E i ai lava follow up a tatou e fai ae ua tuu lava i lona faitalia, e faafae ai ma soifua ma faafilemu ai lava ia i le maota. E le gata foi i lea, o le tagata e negative, e faapena lava. E pau le fautuaga la e ave malosii e le Matagaluega, o lea e faafofoga mai susuga i alii fomai. Ia tausisia le talifofoga i mea faitele le mea e agai i ai, aemaise foi o le tu vava ma le nofo vava, aemaise lava tulaga faapena. A i ai a i ai loa ni auga, ona taumafai loa lea e vave ona vaai se fomai. O le mea matautia lea e tupu nei, e pei ua soifua tatou ua ola samasamanoa tagata ua le popole i le matautia, o le mea lea ua i ai. Aua a silasila i ai, ana oo mai i le taimi lenei o isolate o tatou tagata i le faletalimalo, le mea o le tupe e alu ai, aemaise o le mea o sekulati. Aua o le taimi nei, na ou sau ou vaai i le tele o le mau sekulati, toetiiti maua le sefulu na ona tupu i vaega sekulati foi nei, ua tau fai puna mai ona o le tupe. E le i leva lava ona ta vaai i ai i le mea, ia taofi loa le mea lea, ae ola le tagata ia soifua e puipui lava ia. Aemaise o faleie, ua tele ina faamanuia ai le tele o le aufaifaleie, e tutu ai lava i le vaiaso atoa ma le masina atoa. E na o le totogi o le tupe, ae o le mea matautia lena na ou sau ou vaai i ai lau afioga i le Fofoga Fetalai.

O lea la ua ou vaai i le matagofie o le mea lea ua i ai nei, ae....se ese le manaia, o le tuu o le tagata e soifua manuia i lona aiga, aemaise o lona lava nuu. A aafia ai lava lona aiga, ia faitalia ia. Ae o le mea lea e iloa ai, le tagata e alofa i le aiga, ia aua ne i feosofai, a ia puipui ia ma le aiga.

Lau Afioga i le Fofoga Fetalai ma le mamalu o le Maota,ou te faafetai i mea sa laga e sui usufono uma. Lea sa fesiligia ai ma toe faafoi i mafaufauga e pei ona i ai..

FOFOGA FETALAI: Ia malie lau Afioga i le Minisita se i tuu atu le avanoa i le sui usufono o Vaimauga 3.

Afioga Hon Tapunuu Niko Lee Hang: E faamalulu atu i le Minisita e le fia faalavelavea lana saunoaga matagofie. A ua ou tulai atu e faafetai lau afioga. O lau fesili, ana ou le laga le mataupu, e leai lava ma sau galuega e fai e advice ai lou uso ia Leatinuu. Ae faafetai ua fai mea faalogo mai Leatinuu i lau afioga, ona o le fautuaga lelei, ona sa ou popole i te i ua aafia, a le o oe o Olo, i le faamai, pe a faapea e sau Leatinuu ma le faamai. Ia faafetai ua e talia le fautuaga, ia manuia faafetai.

FOFOGA FETALAI: Ia malo...mo le faasaoina o lou taimi, se i tulai mai le sui usufono mo Siumu.

Tofa Hon Tuuu Anasii Leota (Siumu): E le fia faalavelave foi i le saunoaga matagofie a le Minsiita, faafetai tele lava, o lea ua faafofoga le Maota, ua faafofoga foi Samoa, o lea ua e laulau mai tagata ua aafia i lenei faamai ma i latou ua maliliu. O lea sa ou talosaga atu ina ia manino, ma malamalama le atunuu i lau saunoaga. Ua faafetai tele lava, ona sa ou avatu fautuaga, ia faaauau pea ma faatauaina pea le Matagaluega ia a tatou talifofoga, ma taumafai e faasala pea, e vave ai ona usitai tagata. Ae faafetai ma faamalo o lea ua e tali manino mai i se mea foi na laga e lenei itumalo, ia saga faamanuia le Atua i lau Afioga, faafetai i le Fofoga Fetalai mo le avanoa.

FOFOGA FETALAI: Faafetai mao...lau Afioga i le Minisita.

Afioga Hon VALASI LUAPITOFANUA TOOGAMAGA TAFITO SELESELE: Lau Afioga i le Fofoga Fetalai, ou te le faataumatatao i le toeaina matua o le Maota. O le faafesili, o i e te silafia ai Tapunuu ia mea o Minsiita e faaloalo i le isi sui usufono. e tusa lava pe le o mai, ae o le faatonuga i le Minisita e alu e filemu i le fale. O lea la ua e silasila i ai, ana faapea e aumai lau fautuaga ae le talia e le Minisita, e ui lava o lea sa sao fuafuaga uma. Ae ou te faafetai foi i le afioga i le Minisita, leaga e faapena

le Kapeneta, e ese le faaloalo o le isi Minisita i le isi Minisita. Ae le faapea ua ou tali atu ona ua ou usitai, o le faaloalo i lau tuualalo.

Lau Afioga i le Fofoga Fetalai, ou te faafetai i le sui usufono o Siumu, o le isi foi sui usufono matua o le Maota. O le agaga lava lena Tuuu, lau susuga i le sui usufono, o lea foi ua uma oan ave lau tuualalo i susuga i alii fomai, ia fai ni kopi o mea uma nei, ma ia tufatufa mai i sui usufono ae le i uma le fono, aemaise lava o talaaga ma tulaga e pei ona i ai. Ma le isi mea, a o faafofoga mai susuga i fomai, ua outou iloa lelei la outou Minisita, e le manao e aitalafu ni upu, ia vaai travel advice, po o fautuaga i tagata malaga mai, aua o le toatele ia o tatou e le malamalama, po o a ni mea e tataua ona tapena, ae le i foi mai le tagata i Samoa. O lea ua taumafai le Matagaluga e aveese uma isi mau gaogaosa.

Lau Afioga i le Fofoga Fetalai, ua le o toe i ai ni test tetele e masani ona omai fai ma aoina ai le atunuu. E pau lava o le mea, afai lava o le malosia o le test lea na sau ma ia i Niu Sila, ua lava lena, pau o le mea ia vaai lelei o tatou... o le tele o mea, e oo foi i pepa faatumu, ua taumafai lava e faafilemu, ma ia aveese le gasu tele lea. A ia tuusao lava le tagata, sau loa siaki loa ma alu loa i le fale. O le mea lena ua i ai avanoa, faafofoga mai foi Samoa, o lo o fofou mai, o le agaga atoa lena.

Lau Afioga o le toatele ia o tagata e fesootai mai, ta te moe i le po ta te le ma moe. E fiu le fafine e fagufagu au, ae pei ua ou fasa i ni tagata. O le faalavelave o le taimi e moe ai, e vili mai, e vili mai lava i le malaevaalele i Aukilani. Lau Afioga i le Minisita, o lea e fai mai le Ofisa le e kilia matou, seivagana ua aumai se faatanaga mai i ina i lau Afioga. Ona taumafai lava lea i se auala. E le o ni ou aiga o tagata e masani, ona latou te iloa, e pau lea o le Minisita alofa lea e i ai.

Lau Afioga i le Fofoga Fetalai, o fesoasoani e tuuina atu i tatou tagata e tasi lea matafaioi, po o le po, po o le a lava le taimi, e tu lava ma savali. E oo foi i susuga i alii fomai, se valuapo ae tatagi se telefoni, Dr. Tagaloa, Dr Glenn, e i ai le mea lea ua vili mai ai le tagata. E tali atu... e tasi lea mea e momomo ai le lotu, ma e ese lou faatuatua o susuga i fomai, aemaise le tali mai i taimi o faigata. Faafetai lava i alii fomai, aemaise o le Matagaluga. Ona ou oo mai lea i le talosaga a se tasi o sui usufono mamalu o Salega 1. Sa ia taua ma talosaga i se afi moli ua faaletonu. Lau afioga i le sui usufono, ou te le taliaaina le talosaga, ua uma ona tapena le afi mo lou falemai. E masalo e uma le vaiaso lena, ae le i uma foi, e te oo atu ua i ai le afi. O le taimi lava na e talosaga mai ai, na ou taumafai e fesootai fafo i Amerika, Sapani, ae na maua lava i Samoa le afi. Lau Afioga i le Fofoga Fetalai, aua e te popole. Sa e talosaga foi i se taavale, o lea le mea na tali atu? na tali atu le taavale. O oe lava le sui usufono na muamua faaogaina le ambulance ae le faaogaina e mai. Lau Afioga i le Fofoga Fetalai ma mamalu o le Maota, o lea ua tali atu le Minisita, ua maua le afi faaleoleo, o le afi sa i Tuasivi, o lea ua maua e matua

100%. O lea o le a avatu, a o lo o faatali nisi tatou afi. Aua le popole, o le mea lava lene ua i ai fuafuga ia aua ne i i ai se faaletonu.

O le a ou talanoa i le okaina o vailaau, o lene ua ou fai atu, o oka lava ia o fualaau mo tagata gasegase a le itumalo. Ae le solomua i le sui usufono alu atu faatumu ai ana fagu fualaau, ae tuu tagata o le itumalo. O lea ua i ai a tatou faiga ua tau o le M-Supply, e mafai lava ona oka sao mai e le falemai lava ia, ia fualaau i le warehouse a le falemai, ona oka sao mai i le falemai ona maua ai lea o supply a lene falemai. E le o toe i ai se mea o faaletonu lau afioga. O le taavale a le aufaigaluega e pei ona e talosagaina, ia taoto mai. O lo o i ai a tatou fesoasoani mai fafo, a o ia fesoasoani, e vaavaai lava e le tasi se falemai. A o le agaga e sili ona taua, ina ia faasoaso a tatou itumalo. Ona ou oo mai lea i le talosaga a si au uo, le afioga ia Leana po o Safata 1. Ua malo faafetai, i na foi taimi lau afioga i le sui usufono, e moni lava lau faaaliga. O le taavale sa ou oo atu ma momoli atu, feagai ai matou ma le itumalo, ma le CEO ua uma atu nei o Leausa, o faaupuga lava, o le taavale a Saanapu. O lea ua ou faatonua le Matagaluega, ia e afio atu i tua, ua tu lelei. E pau lava le mea sa faapea mai le aufaigaluega, a momoli tagata faigaluega, ona o le toatele o latou tagata faigaluega e o mai i ina, ona taumafai lea e moe i ina ae usu mai i Saanapu. Ona fai mai le mau, lea e tuu atu i lau afioga, silasila ane i ai, e le malu le taavale i i, ona e leai se mea e tuu ai, aemaise foi e faigata ona tuulafoai le tutu ai le taavale, ae leai se mea e puipui ai. Ia taatia atu i lau Afioga, a o lea ua ou tali atu, e leai e tumau lava e i ai o le taavale a Saanapu. O le van lene, ina ia mafai ona fesoasoani i galuega fai. Ae tulaga uma lava lau afioga e pei foi ona e talosaga mai, ma le falemai. Ua uma ona faagaoioi fuafuaga uma, o lea foi ua faafofoga mai le Matagaluega. E tasi lea falemai ua tuu i ai le faamuamua aemaise o Falelatai, ma le nofoaga o fomai aemaise foi le faaleleia o falemai.

Lau Afioga i le sui usufono o Safata, malo le taulagalaga. E pau lava le fautuaga i lau afioga, se i toe silasila ane i le lisi o le fanua, e pei ona ou fai atu e le o ni tala e avane ai. E 35 tausaga, i lau sailiiliga, e le i i ai ma se lisi na faia. O lea la sa ou talosaga atu ia i latou e ou le fanua, ia aumai lelei le faafanua ma le ata o le ogaeleele lea sa fausia ai...ou te iloa o le mea lene, a oo foi au sailiiliga lau Afioga i le sui usufono, e te faaluaina se manatu ua avatu. E mai lene taimi e 35 tausaga, e le i ai se lisi ua aloaia i le fanua. E tasi lene mea o lea e vaai i ai le fausia o le...ne i mea ane ua alu alu ae feteenai ai ni tagata i le fanua. Ae ou te talitonu, ou te iloa o lene ua i ai le finagalo o le tatou nuu aemaise foi o le mea ua i ai le falemai. E pei o nai vala na, seivagana ne i i ai se mea o misi atu, tuu atu le avanoa ae ou nofo i lalo.

Afioga Leana Ronnie Posini: Lau Afioga i le Fofoga Fetalai,

FOFOGA FETALAI: Tulai mai lau afioga i le sui usufono o Safata 1 leaga sa e taua i lau lauga.

Afioga Leaana Ronnie Posini: E faafetai tele i lau afioga i le Minisita. Ua taliga lava e fia faalogo foi le Maota i le saunoaga a lau Afioga ma le tulaga i le faamai, e pei o lea e ave i ai le faamuamua a lau afioga. E momoli atu ai le faamalo i lau afiga i le tulai mai o lau afioga i taimi faigata o le tatou atunuu. Ua malo toa malo foi faatoatoa i lau afioga. A o tulaga ua e taua le taavale falemai ma le falemai, e faafetai tele lava i lau Afioga e le toe i ai se matou tala, o le agaga faafetai.

O mea lava e faamanino, o lea foi ua malamalama le faafogafoga mai a si o matou itumalo, e i ai lava nai toa na o le a agai i ai ma soalaupule ona ou oo atu lea i lau Afioga ta feiloai. Ma le agaga faaaloalo. Faafetai.

Afioga Fepuleai Faasavalu Faimata Sua: Lau Afioga pe maua se avanoa.

FOFOGA FETALAI: Se i tulai mai le Afioga i le sui usufono mamalu mai Salega 1.

Afioga Fepuleai Faasavalu Faimata Sua: Faafetai lava mo le avanoa lau Afioga i le Fofoga Fetalai. Ia o lea ua maua foi ua oo le saunoaga a le Afioga i le Soifua Maloloina i lenei itumalo. Faafetai i lau Afioga i le Minisita ua e tali aloaia i le talosaga a nai o matou itumalo o lo o faaogaina le falemai lea e tasi. O lea ua e saunoa i le afi mai fafo, ia e talitonu o le a umi lea afi e faaogaina aua o le afi mai Sapani.

A o le taavale, ia ou te iloa o lea o le a ou tatalo atu i le Minisita o Tupe ma le Minisita o Galuega e fesoasoani mai i le tau suega o se taavale mo le falemai. Ia faafetai mo le avanoa.

FOFOGA FETALAI: Se i tulai mai lau Afioga i le Minisita.

Afioga Hon VALASI LUAPITOFANUA TOOGAMAGA TAFITO SELESELE: Lau Afioga i le Fofoga Fetalai, e momoli atu le faafetai i le Afioga i le sui usufono mo Safata 1. E leai e i ai lava taimi tatou te faasolo ai o tatou mafauauga aemaise foi tulaga o tatou, ae o le agaga lava ia i le faamaoni, faafogoga le Atua i tatou upu ma tala, e leai lava se mea, o mea lava sa faataoto mai ma taumafai ina ia faataunuu, o lea lava ua agai i ai tatou fuafuaga. E i ai le talitonuga, faafetai tele i le tulaga e pei ona i ai lou finagalo. Na pau lena o se fautuaga, ia e silasila ane i se mea e tuu lelei ai le taavale, aemaise i latou e tataua ona faafoeina lelei.

Ia, o se mea e fia faamanino i lau saunoaga le sui usufono o Salega 1, o lea sa manino lava lau tala, na sue i fafo, ae na maua lava i Samoa lau afi. O

lona uiga, e le o se afi faaletonu. A o le agaga taua, ia fai lelei le afu, o lea foi e Minisita le tamaitiiti Salega vaeatu le Minisita, masalo o le mea sili ona taua lea e tuualalo mai Olo, ne i meaane foi ua faamumu ai ou moli Fepuleai i le afi a le falemai. Ae tele ou itutino malolosi lea e faalagolago i ai Fepuleai, e le gata i le Minisita o Tupe, a o le Minisita o Galuega Tetele. O lona uiga, tatou amata i le afi lena. O le afi lea o le a avatu ia oe, e mumu atoa ai le itumalo. O lona uiga, afai e le fiafia i ai le tou falemai, ia toe faafoi mai ae avatu se tamai afi.

Lau Afioga i le Fofoga Fetalai ona ou oo mai lea i le sui usufono mamalu o le Itupa i Luga, si au uo, le Komiti Tumau, le Afioga i le sui usufono, o lea foi sa ia taua ma fesiligia faamaumauga ai o le Koviti-19. Ia o lea ua tali atu lena vaega, aemaise foi le saunoaga a le sui usufono, tasi lenei sui usufono mataalia ona o le silasila foi i mea tau vailaau aemaise foi o tulaga o oka a falemai pei ona i ai le tau faamatala atu. E i ai le talitonuga lau Afioga i le sui usufono, ia aua le popole, sa fesiligia lava tatou fomai, aemaise supply nei, leai o lo o mautu ma lelei fuafuaga uma. Pau lava le mea e ala ai ona tuai ona alu atu le oka ona o le faatuai mai o oka a itumalo. A o le agaga lava ia, o lo o ua lava ma totoe a tatou supply, aemaise lava i mea o vailaau e faaogaina. O le ala lea lau Afioga i mea sa laga e le sui usufono o le Itupa i Luga, faafetai tele. E momoli foi le faafetai i lau Afioga ona o le tele lava o taimi ta te talanoa ai, e aumai lava au fautuaga ma tuualalo mai, aemaise lava le faagaioioiga o tulaga uma.

Lau Afioga i le Fofoga Fetalai, ona ou oo mai lea i se tasi o sui usufono mamalu, sui usufono matua, Afioga ia Aiono le Laau na Fausia. O le lauga atoa a Aiono, le afioga i le Laau na Fausia, o ana fautuaga, po o tapena le tatou Matagaluega, aemaise foi ia tapena mamao, aemaise tulaga o le sauniuni i le tele o nei mau faamai e fofou mai, aemaise foi tulaga e pei ona i ai. O fautuaga faa-tama. E momoli le agaga faafetai i lau Afioga Aiono, ma o le agaga sili ona taua, o le fautuaga lava lea a le Matagaluega, o lo o tatou tapena tatou uma ia tapena amata atu i lou lotoifale, ia te oe lava ia ma le aiga, o le nuu ma le itumalo, aemaise lava lo tato siosiomaga itulaga e pei ona i ai o tatou aiga i tua. Aua o le mea moni lava a oo ina sau le faamai, aemaise foi o le tele o le mau vairusi lea e taua, ae ou te talitonu, afai tatou te folau ma le faatuatua i le Atua, o le a se mea tatou te popole ai? Vagana le tagata foi lea e seasea fai se tatalo i le taeao ma le afiafi, a o le i moe foi pe tofa, ona popole lea i mea o fatiatamai. Ae pei ona ou fai atu, talu lava ona tatou puipui i le Koviti-19, lea foi ua oo mai ma ua salalau, lea foi ua tatou vaavaai i le tulaga ua i ai, ou te talitonu, o le taua ia o le tatou galulue i tulaga e pei ona i ai.

Lau Afioga i le Laau na Fausia, faafetai tele mo le fautuaga. E lagona gofie, aemaise o fautuaga a outou le aumatutua i le tofa ma le faautaga, ia lea ua matimati ai, aemaise foi o le vaavaai i ai a le Matagaluega i ona vaega uma. E tele le taua o lau saunoaga ma tuualalo mai i tulaga e pei ona i ai fuafuaga

alualumamao, o lea foi ua faaleleia tatou nofoaga i uta i le falemai e pei o nisi tulaga pei o le mea sa i ai le Outpatient tuai, aemaise foi le fale o tamaiti sa i ai talu ai, o lea ua faagaioi galuega mo le toe faaleleia atili, ina ia mafai ona maua tulaga o le puipuiga e pei ona i ai a tatou mai. O lo o i ai foi le agaga e faafetai foi i nisi o itumalo, faafetai foi ia Sagaga le Afioga ia Tuisamau, Maulolo i le taimi o vevesi le Koviti-19 i lockdown ia sa fai, sa oo mai lava le valaau, o lea ua logo atu Valasi lau Afioga i le Minisita, o lo o ua tapena faleaoga ma nisi nofoaga o le tatou nuu nei ma le itumalo, e ese le taua o le agaga lea. E le tau faatalitali se i valaau atu le Matagaluega pe tau faatalitali se i logo atu le mea e ao ona fai. Ae ou te faafetai tele, o le mea lea e tau o le tofa ma le faautautaga e tausai ai nuu ona o le silasila i tulaga. Aua a oo lava ina vevesi pe pesia tatou i so o se faamai malosi, o le agaga lea, e oo atu le Matagaluega ua fola tagata, tatou te le iloa na mea, na o le Atua. Ae o le galulue faatasi o itumalo ma tatou nuu i alii ma faipule, e leai lava se isi mea e sili ona vave ma mamalu ma taua o pulega a alii ma faipule. Lea e momoli atu ai le agaga faafetai ma le faamalo i tulaga uma e pei ona i ai tulaga e pei ona aliali mai. Lea e faafetai atu ai i nisi o sui usufono sa logoina mai ma faafetai mai, aemaise foi ma tuu mai le tauau ia fesoasoani i tulaga uma pei ona i ai le faigata ma fuafuaga pei ona i ai i le taimi nei.

I lau vaavaai ne i meaane ua misi se mea i le talanoa atu, ae pei ona ou fai atu, e le tele ni sui usufono sa latou taua le falemai, ae seiavagana ua misi, aua o le isi lava mea lena e faauouo e le tagata o le misi.

FOFOGA FETALAI: Ia, malie lau Afioga i le Minisita, o lea e matau atu o lea e tau tulai mai le sui usufono mo Sagaga 2.

Susuga Maulolo Tavita Aмосa: Faafetai. Ina ne i gugu Sakaria i le saunoaga a le Afioga i le Minisita i le matou itumalo ona faapea lea ai e talitua le tou muaau. E momoli atu foi le faafetai a le itumalo lena o la e faafofoga mai, ona e tolu aso na valaau mai ai, a o le aso lona fa taunuu atu ai la outou team, sa fai le matou training ma faapena loa ona faagasolo le matou taumafaiga. Ia o lena foi ua tauaoo atu le lipoti a le matou itumalo i le tasi le vaiaso, ae 227 i latou na mafai ona fai le rat test. E 32 na maua e positive. Faafetai tele lava i le vave tali mai o le taumafai atu o lena itumalo. Ma le faaaloalo lava.

FOFOGA FETALAI: Ia, se i saunoa mai lau Afioga i le sui usufono mamalu mai Vaimauga 1.

Afioga Sulamanaia Fetaiai Tauiliili Tuivasa (Vaimauga 1): O upu a le atunuu a manaia lava se pese, ta te fia siva lava. Faafetai foi i lena taeao i le matagofie o le saunoaga a le Afioga i le Minisita, leaga o lea o le a misi le mea taua sa laga e lena sui usufono, sa aumai i lau Tala o le Tupe ma sa ou

taua i le tulaga lea o le faapau o le tau o tatou vailaau po o tatou talavai. Po o lene ua misi i lau Afioga, ae o lene sa tuuina atu ai le fesili po o afea e amata ai le tatou faamoemoe lene, a o le a foi le tau o le a vaai ai tatou mai pei ona ou taua i lau lauga, o lo o \$10 nei po o le mea o le a vaai le tatou falemai i le \$5.

E pei o nai mea na, ae momoli lava le agaga faafetai i lau Afioga i le Minisita. Masalo o le isi Minisita lene e fiafia ai lava lenei itumalo. E malie lava le loto i saunoaga foi ma faafetai e ave i Ofisa Sili o Pulega o Matagaluega aemaise o ni auaunaga. Ae pei o lene ua misi le mea taua lava lene sa avatu e lou uso a sui usufono, ona o le tau o tatou fualaau ma tatou mea na sa aumai i lau Tala o le Tupe o le a pau. Ma lou faaaloalo lava lau Afioga i le Fofoga Fetalai.

FOFOGA FETALAI: Malo. Ia mo le faasaoina o lou taimi lau Afioga i le Minisita, se i tulai mai le sui usufono mo Aleipata Itupa i Luga.

Afioga Fuaava Suluimalo Amataga: Faafetai lava i lau Afioga i le Fofoga Fetalai mo le avanoa. Ia e momoli atu foi le agaga faafetai i le Afioga i le Minisita, ia ma ua lologo foi le Maota ne ii le saunoaga matagofie i lenei taeao.

Ae o lou tulai atu ona o le tulaga foi lea i se faamaite a lenei itumalo i le tulaga lea i le tatou Koviti-19, i faamaumauga lava foi lele si tamai faamaite i le tulaga lea aemaise lava tuua matutua, aemaise foi i latou ua maliliu i tua pe na mafai ona fai se tatou scheme foi lele e test pe Koviti-19 related foi lele. Ona e pei o faamaumauga o le 29 lea e i ai, e pei o i latou lava ia ua siimai ma taofia i le falemai, na o se faamaumauga mo le agai i luma ina ia atoatoa e tapena ai foi nisi o tapenapenaga a le Matagaluega i le agai i luma. Ae faateleina pea le agaga faafetai i lau Afioga i lou talimanao mai foi e tusa ai ma le tagisa o lenei itumalo e tusa ai ma le falemai.

Ae pau sina vaega laitiiti e toe faaopopo atu, o le tulaga lea o avetaavale pei ona tatou talanoa ai foi. Ia sa i ai sou tei e tausavali atu lava tausimai i le fale e fai ai ona togafitiga. A oo la i le taimi foi lea e manaomia le ambulance ona e bed ridden foi lele, e manaomia le ambulance e tatau ona ave ai i le falemai, ae tasi lava si avetaavale la e tulituli e piki mai. Ae o se tulaga lene ma le agaga faaaloalo e manaomia ni nai isi avetaavale mo le ambulance, ae ese ai foi le taavale mo le falemai. Ma le agaga faaaloalo faafetai.

FOFOGA FETALAI: Ia, se i tulai mai lau Afioga i le Minisita. Malie lava lau Afioga i le Minisita, se i tulai mai le sui usufono mamalu mai Aana Alofi 2.

Afioga Aiono Tile Gafa (Aana Alofi 2): Faafetai i lau Afioga i le Fofoga Fetalai. Ou te tulai atu ma le agaga faaaloalo ua logoitino matagi lelei i le

saunoaga a lau Afioga i le Minisita. O lea ua maea ona e oooo lava i tulaga uma aua le galuega. O le taitai alofa e pito i luma, e tu i luma, ae le alo foi saunoaga ma upu. Malo faafetai i lau Afioga i le Minisita. E tasi lava le mea lea na ona ou avatu leaga sa afea e lau faamatalaga lau Afioga, ua faalogo i o i le matou falemai i Leulumoega, ua fiafia tagata o le a fafaga latou. Ia na o sina au saunoaga lava e faamanino le tulaga lea aua o lea ou te vaai atu o lea e... ona manino ai lea. Faamolemole i lau Afioga. Faafetai i lau Afioga i le Fofoga Fetalai.

FOFOGA FETALAI: Ia mo le faasaoina o lou taimi, se i muamua tulai mai le sui usufono mo Gagaemauga 2.

Tofa Seuamuli Fasi Toma: Faafetai i lau Afioga i le Fofoga Fetalai mo le avanoa. Ua gau lava lou loto i le matagofie o le saunoaga a le Afioga i le Minisita. E matau atu foi o le a faaiuiu le finagalo o le Afioga i le Minisita ma le Matagaluega, ae pei sa aafia i se faamoemoe le falemai lea i Vaipouli. Ou te masalo o le falemai lea i Vaipouli, a silasila i ai le paia o lenei Palemene, o se nofoaga toamalie ma le filemu, le nofoaga lea i Vaipouli. Ia sa masani lava ona o atu le fomai lea i le Aso Gafua, ae mo le taimi nei, ua le o toe... O le ala lea o lau faafesili atu i lau Afioga i le Minisita. O lona lua, faafetai tele lava i le auaunaga i le Afioga i le Ofisa Sili ma le vaega lea o lo o feagai ma le faamamatoto. Faafetai tele lava lea foi ua maua o le a siitia i le masina o Setema i le nofoaga fou. Ia faamalo faafetai.

Na pau lava o lea lau Afioga i le Minisita, ia pe le alagataua ni nai masini taitasi i falemai ia faaitumalo i tua ona e fai sina tau maomao aemaise lava tatou i Savaii ma le motu nei i le mamao o le tuli mai Tuasivi, aemaise foi i inei po o le sau i Aleipata po o Falealili po o Aiga i le Tai, i le tau tuli mai o i inei i Apia i Motootua.

Ia pei o se vaega lea ma le faaaloalo. Faafetai.

FOFOGA FETALAI: Ia mo le faasaoina o le taimi lau Afioga i le Minisita, se i tulai mai le sui usufono mamalu mai Faasaleleaga 2.

Afioga Magele Sekati Fiaui (Faasaleleaga 2): Faafetai i lau Afioga i le Fofoga Fetalai, faamalo foi i le Afioga i le Minisita. Sa tapuai lava foi ma le fiafia lenei itumalo i le saunoaga, ae manatu foi ua logo faa-Tutuila le Maota nei i le tofa faalele ma le tofa alualumamao a le Afioga i le Minisita. Na o sina mea laitiiti lava lea lau Afioga i le Fofoga Fetalai, leaga o lea sa saunoa le Afioga i le Minisita i vaega foi ia tetele e 2 o le soifua maloloina, lea sa saunoa ai e leai se isi sa talanoa i le tulaga lea o le tatou Kidney Foundation. Ia mo le faasaoina o tatou faamaumauga foi lea lau Afioga, leaga masalo na o au lava le sui usufono sa taua le Kidney Foundation, lea foi sa agai i ai le faafetai ma le faamalo foi i lea Ofisa mo le galuega taua mo le tatou atunuu.

Ia na o sina vaega laitiiti lava lena i le saunoaga a le Afioga i le Minisita ae ua matagofie mea uma i lenei taeao. Faafetai.

FOFOGA FETALAI: Ia ou te manatu lau Afioga i le...

Afioga Hon Lautafi Fio Selafi Purcell (Satupaitea): Lau Afioga i le Fofoga Fetalai...

FOFOGA FETALAI: Oi se i tulai mai lava le sui usufono o Satupaitea.

Afioga Hon Lautafi Fio Selafi Purcell: O le sui usufono mulimuli lava lea. Sa ou musu lava ou te tulai atu e fai se tala i le lauga matagofie, ae o lea ua ou vaai atu pei lava o le a uma le taimi. Faafetai atu i le Afioga i le Minisita mo le faamalamalamaina o le mataupu lea o le nofo vaavaaia. O nei, e uma ai le nofo vaavaaia o si ou toalua e fitu ai ona aso. Fitu aso mai le vaiaso lea na tea nei. Ia o le usitaia lava i faatonuga foi a le aufaigaluega i o i Faleolo. Ou fai atu, usitai i le mea lena e sau i ina, o la e usitai lava. O lea foi la ou te usitai lava au, e sã ona ou latalata i lou toalua. Fitu aso, o se matua faasalaga tele lenei mea. Ona o nei la e uma ai, o nei e uma ai le nofoesea ia, lau Afioga i le Fofoga Fetalai, ou te le sau la i le Fono nanei, o lea o le a ou nofo e kuka lelei se ma mea meaai ma si ou toalua.

Lau Afioga i le Minisita, ne i te i ua misi i lau Afioga, leaga o lea ou te iloa na ta o foi i le falemai talosaga mai, o la e faafogafoga mai nai teine fomai na talosaga mai i se latou taavale e o ai e fai le latou service foi lea i le community ona o le mea la e tupu e faatalitali se i sau le taavale mai Tuasivi, ia a sau lava ua o, ae a le sau, ia ua faapena. Ae tuu atu i ou autafa se talosaga a le ta falemai i Satupaitea mo se van.

Ma le fausiaina o fale, na ou vaai atu e pei sa \$3 miliona e sau uma lava i lalo o le refurbishment, ae o lea ua aveese lava le \$1 miliona mo fale o fomai. Ae a fua foi i le tau o fale e pei foi ona ou avatua le ata e le iloa pe na o le 3 fale e fai ai pe na o le 2 foi ma le afa. Ia a o lena e te silafia na muamua atu lava le talosaga a Satupaitea. Na ona taatia atu po o afea e amata ai le polokalame lena, ona o lo o faafogafoga mai si ou itumalo.

FOFOGA FETALAI: Ia ua ou manatu lau Afioga i le Minisita atonu e i ai foi se taimi tatou taliu mai foi faamaea foi nai mea na laga e sui usufono. Ae ua faafogofoga le Maota i le saunoaga a le Afioga i le Minisita o le Soifua Maloloina, e le gata o mataupu sa laga e sui usufono mamalu, ae lagona lava le mafatia ona o nisi o le tatou atunuu ua maumau le soifua ona o le faamai. E ui lava i tapenaga sa fitaituga i ai le tatou Malo i le puipuiga ina ia malutia le soifua o nai o tatou tagata, ae ua le mafai lava ona alofia ma ua maliliu ai lava nisi o le atunuu. Ou te talitonu o se mafatiaga e tatau foi ona tatou faatauaina, ma ia faataua e le tatou Maota lea lagona mafatia ua oo i aiga ua

aafia. E ui e le i maua lava se fofo e tineia ai lea faafitauli, ae ua ou manatu, o lea ua folasia aloaia le aofai o e ua maliliu ona o le faamai.

Ou te talosaga atu ai i le tatou Maota, se i tatou tutulai faatasi ma au i se minute e tasi e faailoa ai lo tatou agaga faaaloalo i nisi o tatou aiga ua maliliu ona o le faamai.

Na faaalua le agaga faaaloalo o le Maota i lo latou tutulai mo se minute e tasi a o saunia e le Fofoga Fetalai se tatalo mo aiga ua maliliu i le faamai.

FOFOGA FETALAI: Ia, e i ai le manatu o lea ua tatou taunuu i le tatou taimi malolo, e manava ai foi a tatou galuega. E i ai le manatu o le a tolopo le tatou Fonotaga toe amatalia i le itula e 6:00 i le itula afiafi.

O le mea lea, o lea ua tapena le tatou taumafataga mo la outou taligasua. O le mea lea o le a faataatiaese Galuega a le Fono Aoaio tatou toe feiloai i le itula e 6:00 a nanei i le afiafi.

Na faataatiaese Taualumaga a le Fono Aoaio Faitulafono i le itula e 1:00 i le afiafi.